

Kalaallit Nunaanni sulitilluni ajoqusersinnaanermut isumannaarineq pillugu inatsimmut nalunaarut

Matumuuna Kalaallit Nunaanni sulitilluni ajoqusersinnaanermut isumannaarineq pillugu inatsit nr. 1528, 21. december 2010-imeersoq, inatsit nr. 1568, 15. december 2015-imeersup aamma inatsisip nr. 627, 8. juni 2016-imeersup malitsigisaanik allannguutilinik nalunaarutigineqarpoq.

Kapitali 1

Inatsisip siunertaa

§ 1 Inatsisip matuma siunertaraa ajoqusersimasunut taakkualuunniit sulitillutik ajoqusernemmik qimataannut taarsiissuteqartarnissaq ajunngitsorsiaqartitsinissarluk. Ajoquserneq suliamik imaluunniit pissutsinik sulinermit atugaasunik pissuteqassaaq, tak. peqqussummi §§-it 5-7, sulisitsisorli akisussaaffigisassaminik iliuuseqartariaqarsimasariaqanngilaq. Sulinermit avatangiisinik nakkutilliinermik suliallit sulitilluni ajoqusernissamik pinaveersimatitsiniarnerat sulisitsisut taarsiissutinik il.il. aningaasalersuinerisigut tapersorneqassaaq.

Imm. 2. Ajoqusersimasut taakkualuunniit qimataat aammalu sulisitsisoq, sillimmasiisarfik, pisortat oqartussaataitaat nakorsallu suliamik suliarinninnermit akuliutsinneqartassapput. Ajoqusersimasut taakkualuunniit qimataasa ataqatigiissumik suliniuteqarfigineqarnissaannut pisariaqartitsineq tassuunakkut qulakkeerneqassaaq.

Kapitali 2

Inuit isumannaariffigineqarsinnaasut aamma inatsisip atuuffii

§ 2 Inuit suliamik Kalaallit Nunaanni suliaqartussatut sulisitsisumit atorfinitsitaasimasut inatsit manna naapertorlugu isumannaariffigineqarput. Suliaq tassaasinnaavoq akissarsiaqarluni imaluunniit akissarsiaqarani suliaq, tassaasinnaallunilu ataavartumik, utaqqiisaagallartumik sivikitsuinnarmilluunniit suliaq.

Imm. 2. Sulisitsisup ilaqutai suliffeqarfimmi suliamik suussusiisigut annertussusiisigullu sulisunut allanut naligitinneqarsinnaagunik inatsit manna naapertorlugu isumannaariffigineqarput.

Imm. 3. Namminersorlutik inuussutissarsiummik ingerlataqartut Kalaallit Nunaanni sulisut inatsit manna naapertorlugu isumannaariffigineqarsinnaapput, tak. § 52, imm. 2.

Imm. 4. Inuit, kalaallit umiarsuaataanni sulisussatut atorfinitsinneqarsimasut inatsit manna naapertorlugu isumannaariffigineqarput.

Imm. 5. Meeraq uumalluni inunngortoq, naartuunermi nalaani anaanami sulinerata nassatarisaanik nappaateqale-reersimaguni inatsit manna naapertorlugu isumannaariffigineqarpoq.

Imm. 6. Angajoqqaat naartup naartorineqalernera sioqqullugu meeqqalluunniit inunngornerata kingorna naartumut meeqqamulluunniit ajoqusiinnaasumik sunnigaasimanerat kingusinnerusukkut uppenarsarneqarpat, naartoq meerarlunniit inatsit manna naapertorlugu isumannaariffigineqarpoq. Ajoqusiqaanerit taamaattut inatsimmi § 7-mi pineqartunut ilaatinneqarsinnaapput.

§ 3 Suliassaqartitsinnermut ministerip Namminersorlutik Oqartussat isumaqatiginiareerlugit inatsisip makkununga qanoq atuunnissaanut maleruagassat aalajangersassavai

- 1) meeqqanut 18-it inorlugit ukiulinnut, ullut unnuarluk paaqqinniffiittunut imaluunniit isumaginninnermut tunngasut iluanni najugaqarfinniittunut,
- 2) ilinniagaqartunut inunnulluunniit allanut ilinniagaqarnerminnut suliffimmilluunniit misiliinerminnut il.il. atatillugu ilinniarfimiittunut sullivimmiittunulluunniit, aamma
- 3) inunnut sulisitsisumut kiffartuussinnermini nunani allani suliaqartut itaagallarsimasunut.

§ 4. Sulisitsisumi sulinerit tamarmik sulitilluni ajoqusersinnaanermut isumannaarinnermit pineqarput. Pineqarput sulisitsisup inuussutissarsiuutigalugu inuussutissarsiuutigaluguunniit suliffeqarfiutaani, aammalu sulisitsisup illuani sulinerit kiisalu sulisitsisumut taassumalu ilaqutaanut kiffartorluni sulineq.

Imm. 2. Aammattaaq inuit ingerlatanik makkununga suliaqartut inatsit manna naapertorlugu isumannaariffigineqarput:

- 1) Inuiaqatigiinnik kiffartuussilluni kommuniniluunniit qinigaasimaneq tunngavigalugu suliaqarneq.
- 2) Suliffeqarfimmi sulisut sulinerminni atugarisaannut atasumik sulisunut sinniisutut suliaqarneq.

- 3) Inuup inuuneranik annaassiniarneq, ajoqusernernik pitsaaliuniarneq imaluunniit atortutigut piorsarsimassut-sikkullu annertuunik annaasaqatsaaliuineq, iliuuseq taamatut ittoq § 2 malillugu sulinertut isigineqarsinnaanngikkaluarluni taamatut sulinermit attuumassuteqaraangat.
- 4) Kalaallit Nunaanni inuup inuuneranik annaassiniarneq, iliuuseqarneq pineqartup suliaata nalinginnaasumik ilaginngikkaluarpaguluunniit.

Imm. 3. Inatsisip suliartorluni sulereerlunilu angerlarluni ingerlanermit ajoqusertoqarnerani qanoq innikkut atuunnissaanut maleruagassat suliassaqartitsinermit ministerip aalajangersassavai Namminersorlutik Oqartussat isumaqatigi-niareerlugit.

Kapitali 3

Sulitilluni ajoquserneq

§ 5. Sulitilluni ajoquserneq inatsimmi matumani tassaatinneqarpoq ajoquserneq, tak. § 6, aamma inuussutis-sarsiornermi nappaatigiligaq, tak. § 7, suliamik imaluunniit pissutsinik sulinermit atugaasunik pissuteqartoq.

§ 6. Ajoquserneq inatsimmi matumani tassaatinneqarpoq pisup sunnigaanerulluunniit tassangaannartumik ullulluunniit tallimat qaangiutinnnginneranni pisup kingunerisaanik inuup ajoqusigaanera.

Imm. 2. Ajoqusernermut tunngatillugu inatsisip matuma atuutilerfia tassaavoq ulloq ajoquserfik, imaluunniit sunni-gaanerup ajoquserneqarnermut pissutaasup qaangiuffia, aatsaalli inatsimmi allamik aalajangersaasoqarsimanngippat.

§ 7. Inuussutissarsiornermi nappaatigilikkat inatsimmi matumani tassaatinneqarput:

- 1) Nappaatit nakorsartinnikkut paasisat malillugit immikkut ittumik sunnerneqarnermik pissuteqartut, inuit aalajangersimasut suliatic imaluunniit pissutsit sulinermit atugaasut aqutugalugit inunnit taamatut suliaqartuunngitsunit sunnerneqaatiginerusaat. Aammattaaq meeqqap uumalluni inunngortup nappaatai, anaanaasup naartulluni sulinerata nassatarisaatut meeqqap naartuunermini nappaatigiligai. Suliassaqartitsinermit ministerip Erhvervssygdomsudvalgip inassuteqarneratigut, tak. sulitilluni ajoqusersinnaanermut isumannaarineq pillugu inatsimmi § 9, nappaatit suut taamaattut naatsorsuunneqarnermut allattorsimaffimmi aalajangersassavai.
- 2) Nappaatit allat, matumani ilanngullugit meeqqap uumalluni inunngortup naartuunermini nappaatigiligai, uppersarneqarsinnaappat nappaat nakorsartinnikkut uppersartaatissat nutaanerpaat malillugit piumasaqaatinik nr. 1, oqaaseqatigiinni siullerni taaneqartunik naammassinnittoq imaluunniit suliap immikkut ittumik pissusaanik pissuteqavissutut tamatuminngaluunniit pissuteqarnerusutut naatsorsuunneqartariaqartoq.

Imm. 2. Nappaatit, angajoqqaat naartup naartorineqalernera sioqqullugu meeqqalluunniit inunngornerata kingorna naartumut meeqqamulluunniit ajoqusiinnaasumik sunnigaasimanerannik pissuteqartut allattorsimaffiup imm. 1, nr. 1-imi taaneqartup allannortinneratigut imaluunniit imm. 1, nr. 2 malillugu inatsimmi pineqartunut ilanngunne-qarsinnaassapput, sunnigaanerit taakku naartumut meeqqamulluunniit ajoqusiinnaasumik kinguneqar-simanerat uppersarneqarpat.

Imm. 3. Nappaatit imm. 1, nr. 2-mi aamma imm. 2-mi pineqartut aatsaat Erhvervssygdomsudvalgimut saqqummi-ussereernikkut inuussutissarsiornermi nappaataalersutut akuerineqarsinnaapput, tak. sulitilluni ajoqusersinnaanermut isumannaarineq pillugu inatsimmi § 9. Nappaatit tamakku Erhvervssygdomsudvalgimut saqqummiunneqartassapput, Arbejdsmarkdets Erhvervsforsikringip naatsorsuutigippagu, nappaatip akuerineqarnissaa periarfissaasoq.

§ 8. Inuk nappaammik inuussutissarsiornermi nappaatigilikkat allattorsimaffianni ilanngunneqarsimasumik, tak. § 7, imm. 1, nappaateqalersimasoq inatsit naapertorlugu pisartagaqarsinnaatitaavoq, nappaat pissutsinik inuussutissarsium-mut tunngassuteqanngitsunik pissuteqarsorineqanngippat.

Imm. 2. Inuussutissarsiornermi nappaataalersunut tunngatillugu inatsisip matuma atuutilerfia tassaavoq ulloq nappaa-taalersup nalunaarutigineqarfia, aatsaalli inatsimmi allamik aalajangersaasoqarsimanngippat.

§ 9. Danmark sorsulersimappat ajoqusernerit sorsunnermit iliuutsit kingunerisaat sulitilluni ajoqusernerit naatsorsuunneqassanngillat. Inuilli angallatini umiartornermik aalisarnermilluunniit inuussutissarsiteqarnermit nalinginnaasumik atugaasuni suugaluartuniluunniit sulisuusut, sorsunnermit iliuutsit kingunerisaannik ajoqusernerit atatillugu inatsit manna naapertorlugu taarsiiffigineqarsinnaapput. Tamanna aamma umiarsuarnut aalisarnermik nakkutilliissutinut umiarsuarnullu imaanik misissuinermit atugaasunut, kiisalu inunnt § 67 naapertorlugu aalisartutut piniartutullu isumannaagaasunut atuuppoq.

Kapitali 4

Aningaasat pisartat

§ 10. Aningaasat inatsit malillugu tunniunneqartartut tassaapput

- 1) katsorsartinnermut, sungiusartinnermut atortutigullu ikiorsiissutinut il.il. aningaasartuutit akiliutit, tak. § 14,

- 2) sulisinnaajunnaarnermi ullormusiat, tak. §§-it 16-20,
- 3) inuussutissarsiorsinnaanermik annaasaqarnermut taarsiissutit, tak. § 21,
- 4) ataavartumik ajuuteqalernermi ajunngitsorsiat, tak. § 22,
- 5) toqusoqarnerani aningaasat ikaarsaariarnermi tunniuttakkat, tak. § 23,
- 6) pilersuisigisamik annaasaqarnermut taarsiissutit, tak. §§-it 24-26t, aamma
- 7) qimagaasunut ajunngitsorsiat, tak. § 27.

Taarsiissutissanik il.il. annertussusiliisarneq pillugu malittarisassat nalinginnaasut.

§ 11 § 10, nr. 1, 3 aamma 4 naapertorlugit taarsiissutit aamma ajunngitsorsiat sulitilluni ajoqusernerup kingunerisai tunngavigalugit annertussusilerneqartassapput. Ajoqusersimasup peqqissutsikkut isumaginnikkullu atugai sulitilluni ajoqusernerinnarmut tunngatinneqarsinnaanngippata taarsiissutissat ajunngitsorsiasallu ikilineqarsinnaapput, pissutsilluunniit apeqqutaatillugit atorunnaarsinnaallutik.

Imm. 2. Inuussutissarsiorsinnaanermik annaasaqarneq, ataavartumik ajuuteqalernerup imaluunniit inuup toqnera sulitilluni ajoqusernerup kingunerisaatut naatsorsuunneqassapput, annertunerusumik qularutissaanngitsumik tamatumunga akerliusoqanngippat imaluunniit inatsimmi matumani allatut aalajangersaasoqarsimanngippat.

§ 12 Ajoquserup piumasagaatit § 43-mi taaneqartut naammassiumanngippagit, imaluunniit peqqissarneqarni peqqussutaasunik sumiginnaanermigut akornusersorpagu taarsiiffigineqarsinnaaneq tamakkiisumik ilaannakuusumilluunniit atorunnaarsinnaavoq.

Imm. 2. Qimagaasut toqusup timaanik pilattaanikkut misissuinissaq akerliuffigippassuk, tak. § 41, imm. 2, taarsiiffigineqarsinnaaneq atorunnaarsinnaavoq.

§ 13 Ajoquserup piaaraluneerluni inatsisinulluunniit akerliusumik iliuuseqarluni imaluunniit iliuuseqanngitsoorluni sulitilluni ajoqusernermut pisuusimappat annertuumilluunniit pisooqataasimappat ullormusiaqarsinnaatitaaneq, inuussutissarsiorsinnaanermik annaasaqarnermut taarsiiffigineqarsinnaaneq aamma ataavartumik ajoquteqalernermi ajunngitsorsiaqarsinnaaneq annikillisinneqarluniluunniit tamakkiisumik atorunnaarsinnaavoq. Taamatut pisoqartillugu ajoquserup tamatumunga erseqqilluinnartumik ilisimatinneqassaaq.

Nappaammik katsorsaaneq, sungiusaqinneq atortutigullu ikiorsiissutit il.il.

§ 14 Sulitilluni ajoqusernerup kingunerisaanik sapinngisamik pitsaernerpaamik peqqissinissamut napparsimasup katsorsarnissaa sungiusaqinnissaalu pisariaqarpat, suliap suliarineqarnerata imaluunniit § 47 malillugu suliap suliareqqinnerata nalaani napparsimanermi katsorsartinnermut sungiusaqinnermullu aningaasartuutit ajoqusersimasooq taarsiiffigineqarsinnaavoq. Inunnut Kalaallit Nunaanni napparsimalernissamut isumannaarneqarsimanngitsunut taarsiissuteqarneq inunnut Kalaallit Nunaanni napparsimalernissamut isumannaarneqarsimasunut taarsiinernit annertunerusinnaanngilaq. Sungiusarneqarneq nakorsat nappaammik katsorsaanerannut malitsigittinneqartoq nakorsanit nakkutigineqartumik ingerlanneqassaaq.

Imm. 2. Nappaammik katsorsaanerup sungiusarneqarnerulluunniit kinguneqarlunarnissaat, sulitilluni ajoqusernerup kingunerisaasa annikillissarnissaat imaluunniit inuussutissarsiorsinnaanermik annaasaqarnerup qanoq annertutiginerata aammalu ataavartumik ajuuteqalernerup annertussusiat erseqqinnerusumik paasineqarnissaat qulakkeerniarlugit, aammalu aningaasartuutit peqqinnissaqarfiup tunniuttagai imaluunniit isumaginninnermi tunniuttakkat malillugit aningaasartuutit pisortanit akilerneqarsinnaanngippata issiavinnik assakaasulinnik, timip ilaanut taarsiussatut sanaanik, isarusanik atortutigullu ikiorsiissutinik assigisaanik pisinnermut aningaasartuutit ajoqusersimasooq taarsiiffigineqarsinnaavoq.

Imm. 3. Sulitilluni ajoqusernerup kingorna peqqissininneqarnissamut, sungiusarnissamut atortutigullu ikiorsiissutinut siunissami aningaasartuutaajumaartussanut, isumaginninnermut tunngasut pillugit malittarisassat atuuttut malillugit akilerneqarsinnaanngitsunut aningaasat taarsiissutissat ataasiartumik tunniunneqartussat annertussusilerneqassapput. Aningaasartuutaajuartussat annertussusissaat tassaassaaq ukiumut agguaqatigiisillugit aningaasartuutissat naatsorsuutigineqartut, inuussutissarsiorsinnaanermik annaasaqarnermut taarsiissutissat ataatsikkut tunniunneqarneranni naatsorsuineri kisitsimmik § 31, imm. 4-mi annertussusilerneqartumik amerlisarlugit.

Imm. 4. Atortutigut ikiorsiissutit imm. 2-mi taaneqartoq sulitilluni atorneqarsimappat, atortutigullu ikiorsiissutit suliamik imaluunniit pissutsinik sulineri atugaasunik pissuteqartumik ajoquserneqarsimappat, atortutigullu ikiorsiissutit iluarsanneqarnera nutaamilluunniit taarserneqarnera peqqinnissakkut tunniunneqartut imaluunniit isumaginninnikkut tunniunneqartartut pillugit malittarisassat atuuttut malillugit pisortanit akilerneqarsinnaanngippat aningaasartuutit akilerneqarsinnaapput.

Imm. 5. Ajoqusersimasut imm. 1 malillugu Kalaallit Nunaanni imaluunniit Danmarkimi napparsimmavinni namminersortuni aamma nakorsiartarfinni namminersortuni katsorsartinnermut aningaasartuutit akilertissinnaavaat,

pisortanit tapiissutaasinnaasut ilanngaatigereerlugit, naatsorsuutigineqarpat ajoqusersimasooq pisortat napparsimmaviini nakorsiarfarfiiniluunniit katsorsarneqarnissaminut utaqqissanngitsoq, akiliuteqarneq ataatsimut ullormusianut aamma angallassinermut uninnganermullu aningaasartuutitut sipaaruteqarnermut naleqqutsinneqarsinnaappat.

Imm. 6. Aningaasartuutit imm. 1-5-mi pineqartut, matumani ilanngullugit aningaasartuutit suliassap nalunaa-rutigineqarnera sioqqullugu aningaasartuutigineqarsimasut, qanoq annertutigisumik matussuserneqartarnissaannut maleruagassat Suliassaqartitsinermit ministerip aalajangersassavai.

Imm. 7. Sillimmasiisarfiit aningaasartuutit imm. 1-5-mi pineqartut akilerneqarnissaannik piunasaqaatinik isummerfiginnissinnaanissaannik maleruagassat Suliassaqartitsinermit ministerip aalajangersassavai.

§ 15 Nappaatip katsorsareerneratigut, sungiusaaqqereernikkut imaluunniit piginnaanngorsaaqqereernikkut ajoquserup siunissami peqqissutsikkut atugarisassai inuussutissarsiorsinnaaneralu naliliiffigissallugit tunngavissaqarpat Arbejdsmarkedets Erhvervssikringip aalajangissavaa ajoquserup inuussutissarsiorsinnaanermik annaasaqarnermut taarsiissutinik § 21 naapertorlugu taarsiiffigineqarsinnaanersoq aammalu ataavartumik ajuuteqalernerneq pillugu ajunngitsorsianik § 22 naapertorlugu tunineqarsinnaanersoq. Sulitilluni ajoqusernerup nalunaarutigineqarneraniit ukioq ataaseq qaangiutsinnagu aalajangiinartoqartassaaq. Inuussutissarsiornikkut nappaatit, Erhvervsygdomsudvalgimut saqqummiunneqartussat, piffissarititaasoq ukiut marluupput.

Imm. 2. Sulitilluni ajoquserneq toqumik kinguneqarsimappat, imm. 1-imi taaneqartutuut piffissat taakkaa ingerlaneranni, toqunerup nalunaarutigineqarneraniit naatsorsorlugu, toqusup qimatai toqusoqarnerani ikaarsaariarnermi tunniunneqartartunik, pilersuisorisamik annaasaqarnermi taarsiissutinik aammalu qimagaasunut ajunngitsorsianik tunineqarsinnaanersut aalajangerneqassaaq.

Imm. 3. Inuussutissarsiorsinnaanermik annaasaqarnermut taarsiissutit aamma ataavartumik ajuuteqalernermi ajunngitsorsiat inaarutaasumik aalajangiisoqarnissaa tikillugu siumoortumik tunniunneqartarsinnaapput.

Ullormusiat

§ 16 Sulitilluni ajoquserneq sulisinnaajunnaavinnermik kinguneqarsimappat ajoqusersimasooq ullormusiaqartinneqassaaq.

Imm. 2. Ilaannakuusumik sulisinnaajunnaarnermi Arbejdsmarkedets Erhvervssikringip ullormusiat tamatumunnga naapertuuttumik ikililersinnaavai.

§ 17 Ullormusiaqarsinnaatitaaneq aallartissaaq sulitilluni ajoqusernerup kingorna ulloq naallugu sulinnitsoorfigisamit siullermiit, unitsinneqassappullu ullormi ajoquserup sulisinnaalerfiani, suliartunngitsoornera peqqissinnerminilluunniit nalunaaruteqanngitsoornera apeqqutaatinnagit. Ajoqusersimasorli inuutissarsiorsiummik annaasaqarnermi taarsiiffigineqarpat, tak. § 21, ullormi taarsiiffigineqarnerup sunniuteqalerneraniit ullormusianik piginnaatitaaneq atorunnaassaaq.

§ 18 Ullormusiat suliffeqanngikkallarnermi akunnermut tunniunneqartartut qaqugukkulluunniit aalajangersarneqartut assigai aamma ullut 14-ikkaarlugit kingumut tunniunneqartassallutik. Aningaasarsiaqartooq sapaatip akunnerit 13-ini kingullerni sapaatip akunneranut sulisimanera tunngavigalugu ullormusiat naatsorneqartarput. Aggvaqatigiissillugu sapaatip akunneranut akunnerit 40-nit amerlanerusinnaanngillat aamma akunnernit 20-nit ikinnerusinnaanngillat.

§ 19 Sulisitsisoq sulisinnaajunnaaqqarnermi akissarsiaqartitsisoq ajoquserup ullormusiassaanik, tak. § 18, ajoqusersimasup pisinnatitaannik tiguisinnaatitaavoq. Ullormusiat sinneruttuusinnaasut ajoqusersimasumut tunniunneqassapput.

§ 20 Ullormusiaqarsinnaatitaanermi piunasaqaataavoq sulitilluni ajoqusernerup kingunerisaanik ajoquserup sulisinnaajunnaarnera pillugu nakorsap allagartaliinikkut uppersaasiinissaa.

Inuussutissarsiorsinnaanermik annaasaqarnermut taarsiissutit

§ 21 Sulitilluni ajoquserneq ajoquserup sulinikkut aningaasarsiorsinnaanerata annikillineranik kinguneqarsimappat pineqartooq inuussutissarsiorsinnaanermik annaasaqarnermut taarsiiffigineqarsinnaavoq. Inuussutissarsiorsinnaanermik annaasaqarneq 15 pct.-imit annikinneruppat taarsiissuteqartoqassanngilaq.

Imm. 2. Inuussutissarsiorsinnaanermik annaasaqarnerup naliliiffigineqarnerani ajoquserup piginnaassusii, ilinniagaqarsimanera, ukiui aammalu inuussutissarsiutitigut ilinniqaqissinnaanermut sungiusarneqarnissamullu periarfissai tunngavigalugit pineqartup sulinikkut aningaasarsiornissaanut periarfissatut piunasaqaataasinnaasut isiginiarneqartassapput.

Imm. 3. Inuussutissarsiorsinnaanerup qanoq annertutiginera erseqqissumik paasineqanngippat Arbejdsmarkedets Erhvervssikringi inuussutissarsiorsinnaanermik annaasaqarnermut taarsiissutissat pillugit aalajangiigallarsinnaavoq.

Imm. 4. Meeqqamut naartuunermini ajoquserneqarsimasumut imaluunniit meeqqamut, angajoqqaat meeqqap naartorineqalinnginneranili imaluunniit inunnegoreernerani sunnigaanerisa kingunerisaanik nappaateqalersimasumut inuussutissarsiorsinnaanermik annaasaqarnermut taarsiissutit tunniunneqartalersinnaapput siusinnerpaamik ukiut 15-issaanni.

Imm. 5. Taarsiissutit ingerlaavartumik tunniuttagassatut pisassanngortinneqassapput, § 31-mi maleruagassat naapertorlugit ataatsikkut aningaasanngorlugit tunniutassanngortinneqanngikkunik.

Imm. 6. Inuussutissarsiorsinnaaneq tamakkiisumik annaaneqarsimatillugu ingerlaavartumik ukiumut tunniuttagassat ajoquserup ukiumut akissarsiaasa 4/5-iinik annertussuseqarput, tak. § 28, inuussutissarsiorsinnaanerlu annikillisimappat annikillieriaammut tamatumunnga naapertuuttuussallutik.

Imm. 7. Ukiumut tunniuttagassat 1/12-iat qaammatikkuutaartumik siumut tunniunneqartassaaq, tunniussisarnerlu piffissamiit inuussutissarsiorsinnaanermik annaasaqarnerup paasineqarfianiit aallartissalluni, kisiannili piffissaq sulitilluni ajoqusernerup nalunaarutigineqarfia sioqqullugu aallartissanani. Ajoquserup piffissami aalajangiiffiusumi 63-inik ukioqalereersimappat taarsiissutissat § 31-mi maleruagassat naapertorlugit ingerlaavartumik ukiumut tunniuttakkat marloriaataattut angitigisut aningaasanngorlugit ataatsikkut tunniunneqassapput, tak. imm. 6.

Imm. 8. Imm. 7 naapertorlugu taarsiissutit ingerlaavartumik tunniunneqartarnerat qaammatip pissarsisartup 65-inik ukioqalerfiata naanerani unitsinneqassaaq.

Ataavartumik ajoquteqalernerimi ajunngitsorsiat

§ 22 Sulitilluni ajoquserneq ajoquserup ataavartumik ajuuteqalerneranik kinguneqarpat pineqartoq ajunngitsorsianik tunineqarsinnaavoq. Ajuuteqalernerulli annertussusia 5 pct.-imit annikinnerusutut annertussusilerneqarpat ajunngitsorsiaqartitsisoqassanngilaq.

Imm. 2. Ajuuteqalernerup annertussusia ajoqusernerup nakorsaasarnerup tungaanit isigalugu suussusia annertussusialu tunngavigalugit, aammalu sulitilluni ajoqusernerup ajoquserup nammineq inuuniarneranut akornutissarsiarititai eqqarsaatigalugit aalajangiiffigineqassaaq.

Imm. 3. Ataavartumik ajuuteqalernerimi ajunngitsorsiat aningaasanngorlugit ataatsikkut tunniutassanngortinneqassapput, ajuuteqalernerulli annertussusia 100 pct.-iutillugu 752.000 kr.-ussallutik. Aningaasat § 29 malillugu iluarsiivigineqartassapput. Ajuuteqalernerup annikinnerutillugu ajunngitsorsiat tassaassapput 752.000 kr.-t ilaat ajuuteqalernerup annertussusianut naapertuuttut.

Imm. 4. Immikkut illuinnartunik pisoqartillugu ataavartumik ajuuteqalernerimi ajunngitsorsiat annertunerusunngorlugit annertussusilerneqarsinnaapput, annerpaamilli 752.000 kr.-t 120 pct.-iannut, § 29 malillugu iluarsiivigisat.

Imm. 5. Ajoquserup sulitilluni ajoqusernermini 40-nik ukioqalersimappat ajunngitsorsiat pineqartup sulitilluni ajoqusernerimi 39-nik ukioqalereerfianiit ukiut tamaasa 1 pct.-imik ikileriartinneqartassapput. Ajoquserup 60-inik ukioqalersimappat taarsiissutissat pineqartup sulitilluni ajoqusernerimi 59-inik ukioqalereerfianiit ukiut tamaasa suli 1 pct.-imik ikileriartinneqartassapput. Ajunngitsorsiali 69-ileereernikkut ikiliseqqinneqassanngillat.

Toqusoqarnerani aningaasat ikaarsaariarnerimi tunniunneqartartut

§ 23 Sulitilluni ajoquserneq toqumik kinguneqarsimappat katissimallugu aapparisaq qimagaasoq aningaasanik ikaarsaariarnerimi tunniuttakkanik 137.900 kr.-nik tunineqarsinnaatitaavoq, sulitilluni ajoquserneq sioqqullugu aappariit katissimappata inooqatigiinnerlu ajoquserup toqunera tikillugu attatiinnarneqarsimappat. Aningaasat § 29 malillugu iluarsiivigineqartassapput.

Imm. 2. Aappariit sulitilluni ajoqusernerup kingornatigut katissimappata aappaasup qimagaasup aningaasat ikaarsaariarnerimi tunniuttakkat taakku piumasarisinnaavai, katissimalluni aappariinneq ajoquserup toqunera tikillugu ukiuni kingullerimi marlunni attatiinnarneqarsimappat aappariillu piffissami ajoquserup toqqiani inooqatigiissimappata.

Imm. 3. Aningaasat ikaarsaariarnerimi tunniuttakkat aamma qimagaasumut, ajoquserup sulitilluni ajoquserneq sioqqullugu katissimallugu aapparisaatulli inooqatigisaanut pisassaritinneqassapput, inooqatigiinneq piffissami toqqiusumi ukiuni kingullerimi marlunni attatiinnarneqarsimappat.

Imm. 4. Toqusoq aningaasanik ikaarsaariarnerimi tunniuttakkanik imm. 1-3 naapertorlugit pisinnaatitaasumik qimataqanngippat, aningaasat ikaarsaariarnerimi tunniuttakkat inummot qimagaasumut allamut pisassanngortinneqarsinnaapput, taamaaliornissamut immikkut ittunik pissutissaqartillugu.

Pilersuisorisamik annaasaqarnermut taarsiissutit

§ 24 § 23, imm. 1-3 naapertorlugit aningaasanik ikaarsaariarnerimi tunniuttakkanik pisinnaatitaasoq, ajoquserullu toquneratigut pilersuisorisaminik annaasaqartoq imaluunniit pilersorneqarneq eqqarsaatigalugu toqusoqarneratigut atugarliornerulersussaq tamatumunnga taarsiiffigineqarsinnaatitaavoq. Taarsiissutissat pilersugaanerup annertussusia

qimagaasullu imminut pilersornissamut, tassa ukiut, peqqissuseq, ilinniagaqarneq kiisalu pilersugaqarneq aningaasarsiornerlu eqqarsaatigalugit periarfissai tunngavigalugit annertussusilerneqassapput.

Imm. 2. Taarsiissutissat toqusup ukiumut akissarsiarisimasaasa 30 pct.-iisut ukiumut annertussuseqartut, tak. § 28, piffissap aalajangersimasup ingerlanerani tunniuttakkat tunniunneqartassapput. Taarsiissutissat ulloq toqquik aallernerfigalugu qaammammut 1/12-itut annertussusillit siumoortumik tunniunneqartassapput. Ukiut pisartagaqarfissat annerpaamik ukiunik qulinik amerlassusilerneqarsinnaapput. Toqusoqarnerali pissutigalugu qimagaanersiutisiaqartitsisoqassappat taarsiissutissat aatsaat piffissap qimagaanersiuteqartitsiviup naaneraniit tunniunneqartalissapput. Toqusoq inatsit manna naapertorlugu inuussutissarsiorsinnaanermik annaasaqarnermut taarsiissutinik ingerlaavartumik pissarsisarsimappat, pilersuisorisamik annaasaqarnermut taarsiissutit aatsaat ullup toqqiusup kingorna qaammatip tulliuuttup aallaqqaataaniit tunniunneqartalissapput.

Imm. 3. Imm. 2 naapertorlugu tunniuttakkat piffissami pisartagaqarfissat aalajangikkami allannguuteqaratik ingerlaannassapput, tunniuttakkat tamakkiisumik ilaannakuusumilluunniit ataatsikkut aningaasanngorlugit tunniutassanngortinneqanngippata imaluunniit pisartagaqarsinnaatitaasoq toquppat.

Imm. 4. Qimagaasunut tunngatillugu taarsiissutit ingerlaavartumik tunniunneqartarnerat qaammatip pissarsisartup 65-inik ukioqalerfiata naaneraniit unitsinneqassaaq.

§ 25 Toqusoq qitornaminik pilersussallugit pisussaataaffigisaminik imaluunniit akilersuuteqarfīgissallugit pisussaataaffigisaminik qimataqarpat meeqqat tamarmik, angajoqqaamik arlaannik sulī najorteqartut 18-inik ukioqalernissartik tikillugu ingerlaavartumik pisartagaqarsinnaatitaassapput, toqusup ukiumut akissarsiarisimasaasa 10 pct.-iisut ukiumut annertussuseqartunik, tak. § 28.

Imm. 2. Meeqqap imm. 1 naapertorlugu ingerlaavartumik pisartagaqartitaasup angajoqqaatuariiligaa toquppat, meeraq toqusup ukiumut akissarsiarisimasaasa 20 pct.-iisut annertussuseqartunik piffissami sinneruttumi ukiumut pisartagaqartinneqassaaq. Ukiumut tunniuttakkat taakku meeqqanut tamanut toqusup kisimiilluni pilersugarisimasaanut pisartagassanngortinneqassapput meeqqat 18-iliinissaat tikillugu.

Imm. 3. Meeraq 18-inik ukioqalernermini ilinniartuuppat, pissutsillumi taamaaliornissamut tunngavissaqartitsippata taava pisartagaqartitsineq ilinniarnep naammassinissaanut sivitsorneqarsinnaavoq, sivisunerpaamilli pineqartup 21-liinera tikillugu. Aamma toqusup qitornaa toqunerup nalaani 18-ileereersimasooq ilinniagaqartuusorlu taamatulli periarfissaqartitaassaaq.

Imm. 4. Imm. 1-3 naapertorlugit pisartagarititassat toqusup ukiumut akissarsiarisimasaasa 50 pct.-iinit amerlaneruppata, pisartagassat ataasiakkaat katillutik toqusup ukiumut akissarsiarisimasaasa 50 pct.-iinit ikililerneqassapput. Tassunga peqatigitillugu § 24 naapertorlugu taarsiissutit tunniunneqartarpata tunniuttakkat taamatulli toqusup ukiumut akissarsiarisimasaasa 40 pct.-iinit ikililerneqassapput.

Imm. 5. Imm. 1-3 naapertorlugit pisartagarititat ulloq toqquik aallernerfigalugu qaammammut 1/12-itut annertussusillit siumoortumik tunniunneqartassapput. Toqusoqarnerali pissutigalugu qimagaanersiutisiaqartitsisoqassappat taarsiissutissat aatsaat piffissap qimagaanersiuteqartitsiviup naaneraniit tunniunneqartalissapput.

§ 26 §§-it 24 aamma 25 naapertorlugit ukiumut pisartagarititat tamarmiusut toqusup ukiumut akissarsiarisimasaasa 70 pct.-iinit minneruppata killissarititaasup taassuma iluani pissutsit immikkut ittut tunngavigalugit taarsiissutissanik allanut, toqusup tamakkiisumik ilaannakuusumilluunniit sulitilluni ajoqusermini tikillugu pilersorsimasaanut pisassanngortitsisoqarsinnaavoq. Taarsiissutissat, toqusup qitornassaannut 21-it inorlugit ukiulinnut taarsiissutit eqqaassanngikkaanni ataatsikkut aningaasanngorlugit tunniunneqarsinnaapput, tak. § 31.

Qimagaasunut ajunngitsorsiat

§ 27 Toqusoqarnera piaarluneertoqarnerani mianersuaalliorujussuortoqarneraniluunniit pisimappat qimagaasut toqusumut immikkut ittumik qaniginnittuusut immikkut ittumik ajunngitsorsiaqartinneqarsinnaapput.

Imm. 2. Imm. 1 naapertorlugu ajunngitsorsiaqartitsinissamik naliliinermi, aammalu ajunngitsorsiat annertussusissaannik aalajangiinermi ajoqusiisup iliusaata suunera, taamatullu aamma qimagaasumut qimagaasunulluunniit qanoq naalliutaatigisimanera ajoqusiisimaneraluunniit immikkut ittumik isiginiarneqassapput.

Kapitali 5

Ukiumut akissarsianik annertussusiliisarneq iluarsisuteqartarnerlu

§ 28 Ukiumut akissarsiat tassaapput ajoquserup ukiumi ajoquserfimmi siuliani akissarsiai tamarmiusut. Atorfinitsitaanermi immikkut ittunik atugassaqartitsisoqarsimappat, imaluunniit ajoqusertoq inuussutissarsiornikkut nappaatigilikani pissutigalugu ukiup siulia tamaat akissarsiani pigiinnarlugit sulisinneqarsimanngippat, imaluunniit ajoqusertoq nappaatip ulloq nalunaarutigineqarfia sioqqullugu piffissami sivikinnerusumi sivisunerusumiluunniit inuussutissarsiorsinnaasimanngippat ukiumut akissarsiat missingersuinikkut amerlassusilerneqartassapput.

Imm. 2. Ukiumut akissarsianut ilanngullugit naatsorsuutigineqassapput akeqanngitsumik nerisaqartitaanerup ineqartitaanerullu nalingat kiisalu allat nioqutissanngorlugit tunniunneqartartut nalingat. Suliassaqartitsinermit ministerip inuit sulisitsisuminni najugaqarallartut nerisaqarnerisa ineqarnerisalu nalingat aalajangersassavaa.

Imm. 3. Ukiumut akissarsiat 451.000 kr.-t sinnerlugit annertussusilerneqarsinnaanngillat. Aningaasat § 29 naapertorlugu iluarsiivigineqartassapput.

Imm. 4. Ajoqusertoq 18-it inorlugit ukioqarpat imaluunniit ilinniagaqartuuppat ukiumut akissarsianik annertussusiliinermit, ajoqusertup ajoquserneq pisimanngitsuuppat 18-inik ukioqalereernermit inuussutissarsiornermit ilinniagaqareernermit gulluunniit isertitarisinnaasai eqqarsaatigineqassapput. Ukiumullu akissarsiat minnerpaamik 55.200 kr.-nut annertussusilerneqassapput, ajoqusertup inuussutissarsiorsinnaanera sulitilluni ajoquserneq sioqqulluguli annertuumik annikilliereersimanngippat.

Imm. 5. Piniartutut, aalisartutut, savaatilittut il.il. namminersortutut ingerlatsisunut, ataatsimoortumik sillimmasersimasunut, tak. § 67, aningaasat namminermit atugassat pisat nioqutissiallu nalinginut matussutissat ukiumut akissarsianut ilanngunneqassapput. Aningaasat ullormut narisaqarnermit qaqugukkulluunniit atuuttut akigitinneqartup 1,5-ianik annertussuseqarput, tak. imm. 2. Ukiumut aningaasarsiat 55.200 kr.-nit annikinnerutinneqarsinnaanngillat, aningaasat namminermit atugassat pisat nioqutissiallu il.il. nalingat ilanngaatigereerlugit.

Imm. 6. Pisuni, sulitilluni ajoqusertoqarfiumngitsumi, isertitanut tunngasutigut ataavartumik allannguuteqarsimasussaagalarpata, piffissamiit isertitanut tunngasutigut pissutsit allanngorneraniit isertitassat naatsorsuutigineqartut tunngavigalugit ukiumut aningaasarsiat aalajangersarneqassapput.

Imm. 7. Namminersorlutik inuussutissarsiummik ingerlataqartunut tunngatillugu ukiumut akissarsiat naatsorsornissaannut maleruagassat erseqqinnerusut Suliassaqartitsinermit ministerip aalajangersassavaa.

Imm. 8. Inuussutissarsiorsinnaanermik annasaqarnermit pilersuisorisamillu annasaqarnermit taarsiissutissat ingerlaavartumik tunniuttagassatut naatsorsornissaannut iluarsiiuginissaannullu tunngaviusussamik akissarsianik annertussusiliisoqassaaq. Taakku ukiumut akissarsiat imm. 1-6-imi maleruagassat naapertorlugit annertussusilikkat, 55.200 kr.-t ukiumullu akissarsiat minnerpaaffissaasa sulitilluni ajoqusernerup pinerani atuuttut nikingassutaannik amerlineqarnerisigut naatsorsorneqassapput.

§ 29. Ataavartumik ajuuteqalernermit ajunngitsorsiat, tak. § 22, aamma ukiumut akissarsiat annerpaaffissaat, tak. § 28, imm. 3, sulitilluni ajoqusersinnaanermut isumannaarineq pillugu inatsimmi § 25, imm. 1-imi maleruagassat naapertorlugit iluarsiivigineqassapput.

Imm. 2. Aningaasat ikaarsaariarnermit tunniuttakkat, tak. § 23, aamma ukiumut akissarsiat minnerpaaffissaat, tak. § 28, imm. 4 aamma 5, procentimik Kalaallit Nunaanni akinut iluarsiiussummut naleqqersuutip ukiup siuliani julip qaammataani atuuttup Kalaallit Nunaanni akinut iluarsiiussummut naleqqersuutip juli 2009-imi atuuttumut naleqqiullugu allannguutaanut naapertuuttumik ukiut tamaasa 1. januarimi iluarsiivigineqartassapput. Aningaasat tassuunakkut naatsorsukkat koruuninut 100-mik agguarneqarsinnaasunut qaninnerpaanut qummut akunnaallineqassapput.

Imm. 3. Ingerlaavartumik tunniunneqartartut akissarsiat tunngaviusut aallaavigalugit aalajangersarneqartut, tak. § 28, imm. 8, aningaasat imm. 2-mi taaneqartut procentiata assinganik iluarsiivigineqassapput.

Imm. 4. Suliassaqartitsinermit ministerip Arbejdsmarkedets Erhvervssikringimi siulersuisuniit inassuteqartoqarneratigut ukiut tamaasa oktoberip qaammataa naatinngu sutigut iluarsiiusuteqartoqassanersoq nalunaarutigisassavaa. Allannguutissat januarip tulluuttup aallaqqaataaniit atuutilertassapput.

Imm. 5. Taarsiissutitut pisartagassanik ingerlaavartumik tunniunneqartartussanik, ataatsikkut aningaasannngorlugit akiliinissap kiisalu ataavartumik ajuuteqalernermit ajunngitsorsiat aningaasartaannik annertussusiliinermit taarsiissutissat aamma ajunngitsorsiat, sulitilluni ajoquserneq piffissap aalajangiiffiup nalaani pisutut isigalugu naatsorsorneqassapput.

Imm. 6. Ukiumut ingerlaavartumik pisartagarititat 12-imik agguarneqarsinnaanngitsut koruuninut 12-imik agguarneqarsinnaasunut qaninnerpaanut qaffanneqassapput.

Kapitali 6

Taarsiissutit tunniunneqartarnerat

§ 30 Inatsit manna malillugu taarsiissutit, ajunngitsorsiat aamma ullormusiat ajoqusersimasunut qimagaasimasunullu tunniunneqassapput, taamaattoorli tak. imm. 6.

Imm. 2. Arbejdsmarkedets Erhvervssikringi immikkut ittunik pisoqartillugu taarsiissutit ataavartumillu ajoquteqalernermit ajunngitsorsiat ajoqusertumut qimagaasunullu tunniussinnaavai, aningaasallu akilerallakkat ernialerlugit, tak. § 65, tamatuma kingorna sillimmasiisarfimmi imaluunniit akilersuutit ilaannit piumasaaqatigalugit, tak. sulitilluni ajoqusersinnaanermut isumannaarineq pillugu inatsimmi § 55.

Imm. 3. Arbejdsmarkedets Erhvervssikringip ullormusiat ajoqusersumasut tunniutissavai, kingorna sillimmasii-sarfimmiit imaluunniit akilersuutit ilaannit taarsertillugit, tak. sulitilluni ajoqusersinnaanermut isumannaarineq pillugu inatsimmi § 55.

Imm. 4. Aningaasat imm. 1-imi pineqartut ullormit aningaasat pisassanngortinneqarnerannik nalunnaaruteqarfiusumiit sapaatit akunnerinit sisamanit kingusinnerusumik tunniunneqarpata, aningaasat sapaatit akunnerinik sisamanik piffissarititaasup naaneraniit tunniunneqarnissaat tikillugu erniat ukiumoortut, kingusinaarluni akiliinermi il.il. ernialersuisarneq pillugu inatsit naapertorlugu annertussusiligaasut annertoqqataannik ernialersorneqassapput. Pisuni § 33, imm. 1-imi pineqartuni piffissaliusseq tassaavoq ullormit kommunip utertitsivigineqarnissamik piumasqaammik taarsiissutit akiliteqartussamut inaarutaasumik nalunaarutigisaaniit ullut 14-it.

Imm. 5. Ullormusiaqarsinnaatitaaneq, inuussutissarsiorsinnaanermik annaasaqarnermut pilersuisigisamillu annaasaqarnermut taarsiissutit ingerlaavartumik tunniunneqartartussat pisassanngortinneqarsimasut qaammatip tunniunneqartartunik pissarsisartup toquffiata naanerani tunniunneqartarunnaassaapput.

Imm. 6. Taarsiissutissat qaammammut toqquiusumut tunngassuteqartut aammalu qaammatinut siusinnerusunut tunngassuteqartut tunniunneqarsimangippata taarsiissutissat pissarsisartup katissimallugu aapparisaanut tunniunneqassapput, aappariit piffissami toqquiusumi inooqatigiissimappata. Pissarsisartop katissimallugu aapparisaminik inooqatigisaminik qimataqangippat aningaasat toqusup pigisaanut tunniunneqassapput.

§ 31 Ukiumut ingerlaavartumik taarsiissutissat inuussutissarsiorsinnaanermik 50 pct. inorlugu annaasaqarnermut § 21 malillugu pisassanngortitaasut nalinginnaasumik aammalu taarsiissutisisinnaatitaasoq akuersiseqqaanngikkaluarlugu aningaasannorlugit ataatsikkut tunniussassanngortinneqassapput. Inuussutissarsiorsinnaanermik annaasaqarnermut taarsiissutissat inunnut piffissami aalajangiiffiusumi 63-inik ukioqalereersunut § 21, imm. 7, oqaaseqatigiit aappaat naapertorlugit pisassanngortinneqartut tamatigut aningaasannorlugit ataatsikkut tunniunneqartassapput. Inuussutissarsiorsinnaanermik annaasaqarnermut taarsiissutissat pillugit § 21, imm. 3 naapertorlugu utaqqiisaagallartumik aalajangiisoqarsimatillugu taarsiissutissat aningaasannorlugit ataatsikkut tunniussassanngortinneqarsinnaanngillat.

Imm. 2. Inuussutissarsiorsinnaanermik annaasaqarnermut 50 pct.-iusumut taassumangalu annertunerusunut ukiumoortumik ingerlaavartumik taarsiissutissanik pisassanngortitsisoqarsimatillugu, taarsiissutisisinnaatitaasup tamanna qinnutigippagu taarsiissutissat ilaat inuussutissarsiorsinnaanermik annaasaqarnerup 50 pct.-itai tikillugit annertussuseqartut aningaasannorlugit ataatsikkut tunniutassanngortinneqassapput. Pissarsisussaq 63-inik ukioqalereersimappat taarsiissutissat ingerlaavartumik tunniutassanngortinneqartut aningaasannorlugit ataatsikkut tunniutasanngortinneqarsinnaanngillat.

Imm. 3. Pilersuisorisamik annaasaqarnermut § 24 naapertorlugu taarsiissutissat taarsiissutisisinnaatitaasup qinnuteqarneratigut aningaasannorlugit ataatsikkut tunniunneqassapput.

Imm. 4. Ingerlaavartumik pisartagaritit aningaasannorlugit ataatsikkut tunniutassanngortinneqarneranni, pisartagarisat piffissami aningaasannorlugit ataatsikkut tunniunneqarfigisaanni annertussusiat tunngavigineqassaaq, piffissaq tassaalluni piffissaq aningaasannorlugit ataatsikkut tunniunneqartussat tunniunneqarfigisinnaasaat. Taarsiissutinik aningaasannorlugit ataatsikkut tunniussassanngortitsisarneq taamaallaat siunissami pisussanut atuutissaq. Ingerlaavartumik pisartagarititanik aningaasannorlugit ataatsikkut tunniussisoqartarnissaanut maleruagassat, Suliassa-qartitsinermut ministerip aalajangersassavai Nammisorlutik Oqartussat isumaqatiginiareerlugit.

Imm. 5. Inuussutissarsiorsinnaanermik annaasaqarnermut taarsiissutissat pillugit inaarutaasumik aalajangiisoqarpat, taarsiissutisisinnaatitaasullu taarsiissutissat aningaasannorlugit ataatsikkut tunniunneqarnissaat qinnutigisimappagu, taarsiissutisisinnaatitaasorli aningaasannorlugit ataatsikkut tunniunneqartussat tunniunneqannginneranni toqusimappat, aningaasat toqusup pigisaanut tunniunneqassapput. Ingerlaavartumik pisartagarititanik aningaasannorlugit ataatsikkut tunniussassanngortitsineq pisartagaritit ullup toqquiusup suliani annertussusiat tunngavigalugu pissaq.

§ 32 Ajoqusertoq sulitilluni ajoqusernerup kingunerisaanik Kalaallit Nunaanni atorfillit soraarnerussutisiaat pillugit malittarisassat atuuttut malillugit soraarnerussutisiaqartussaappat, ajoquserup inuussutissarsiorsinnaanermik annaasaqarnermut inatsit manna naapertorlugu taartisiassaasa nalingi ikilisinneqassapput. Ikilitsissut atorfilittut qanoq sivistigisumik sulisimaneq tunngavigalugu soraarnerussutisiaat saniatigut qaffaatip nalingata 2/3-ianik annertussuseqassaaq.

Imm. 2. Sulitilluni ajoquserneq toqumik kinguneqarpat, qimagaasullu Kalaallit Nunaanni atorfillit soraarnerussutisiaat pillugit malittarisassat atuuttut malillugit soraarnerussutisianik pisartagaqartussaappata, inatsit manna naapertorlugu ukiumut ingerlaavartumik pisartagaritit soraarnerussutisiaat toqusup toqugami atorfilittut qanoq sivistigisumik sulisimaneq tunngavigalugu soraarnerussutisarinneqartut saniatigut qaffaatip nalingata 2/3-ianik ikilisinneqassapput.

Imm. 3. Imm. 1-imi 2-milu aalajangersakkat inatsit manna naapertorlugu taarsiissutisisinnaatitaasunut allanut, Kalaallit Nunaanni atorfillit pillugit malittarisassanut naapertuuttumik soraarnerussutisiaqartinneqartussat aalajangersaavigineqarsimasunut taamatuttaaq atuutissapput. Taamaattoqartillugu sillimmasiisarfiup imaluunniit Arbejdsmar-

kedets Erhvervssikringip soraarnerussutisianik tunniussisussap, tak. sulitilluni ajoqusersinnaanermut isumannaarineq pillugu inatsimmi § 55, ajoquserup qimagaasulluunniit inatsit manna naapertorlugu taartisiassaait ilanngaattissat naatsorsorneqarsimasut annertoqqataat akilissavai.

§ 33 Ajoquserup qimagaasulluunniit isumaginninnermut tunngasut malillugit piffissami aalajangersimasumi aningaasanik pisartagaqarsimappata, kingusinnerusukkullu ullormusianik, tak. §§-it 16-20, inuussutissarsiorsinnaanermik annaasaqarnermut ingerlaavartumik taarsiissutinik, tak. § 21, imaluunniit pilersuisorisamik annaasaqarnermut taarsiissutinik, tak. §§-it 24-26, tunineqartussanngortitaallutik, taava kommuni utertitsivigineqarnissaminik sillimmasiisarfirmut imaluunniit Arbejdsmarkedets Erhvervssikringimut piumasqaartussaavoq. Utertitsivigineqarnissamik piumasarineqartut tassaapput aningaasat tunniunneqarsimasut aningaasallu isumaginninnikkut tunniuttakanut peqatigitillugu taarsiissutinik akiliisoqassagaluarpat tunniunneqarsimasussaagaluit nikingassutaat. Kommunilli utertitsivigineqarnissamik piumasqaatai aningaasanut inatsit manna naapertorlugu pineqartumut piffissami tassani tunniunneqarsimasunit amerlanerusinnaanngillat. Utertitsivigineqarnissamik piumasqaat kommunip taarsiissutissanik tunniussisoqarnissaanik nalunaarfingineqarneraniit sapaatit akunneri sisamat qaangiutinnginneranni saqqummiunneqanngippat piumasqaarsinnaaneq atorunnaassaaq.

Imm. 2. Ajoquserup taassumaluunniit qimatai sulitilluni ajoqusernerup kingunerisaanik taarsiiffingineqarsimappata ajunngitsorsiaqartinneqarsimappataluunniit, ajoqusiisoq taarsiissuteqarnissamut akisussaasoq taassumaluunniit akisussaasutut sillimmasiisarfiata sulitilluni ajoqusersinnaanermut sillimmasiisarfirmut imaluunniit Arbejdsmarkedets Erhvervssikringimit utertitsivigineqarnissamik piumasqaartussaavoq, tak. sulitilluni ajoqusersinnaanermut isumannaarineq pillugu inatsimmi § 55. Ajoqusiisup taarsiissuteqarnissamut akisussaasup taassumaluunniit akisussaasutut sillimmasiisarfiata piumasarisasa assigaat aningaasat taarsiissutigineqartussat ajunngitsorsiaritinneqartussallu sulitilluni ajoqusersinnaanermut sillimmasiisarfiup imaluunniit Arbejdsmarkedets Erhvervssikringip, tak. sulitilluni ajoqusersinnaanermut isumannaarineq pillugu inatsimmi § 55, piffissami piumasqaatit saqqummiunneqarfianni akilissallugit pisussaaffii.

§ 34. Piumasarisat ajoquserup taassumaluunniit qimataasa inatsit naapertorlugu pisassarisaat isumaqatigiisuteqarnikkut allanut nuunneqarsinnaanngillat. Akiligassaqarfiit piumasarisat taakku akiliutigittissinnaanagilluunniit eqqartuussiviit aqutqalugit malersorsinnaanngilaat.

Kapitali 7

Nalunaarutiginninneq suliamillu suliarinninneq

§ 35. Sulitilluni ajoquserneq inatsit naapertorlugu aningaasanik pisartagaqarnissamik piumasqaarfiusinnaassangatitaq sapinngisamik piaarnerpaamik kingusinnerpaamillu ajoqusernermiit ullut qulingiluat qaangiutinnginneranni nalunaarutigineqassaaq.

Imm. 2. Sulitilluni ajoquserneq imm. 1 naapertorlugu nalunaarutigineqanngitsoq, ajoqusernerullu pineraniit sapaatip akunnerisa tallimat qaangiunneranni ajoquserup tamakkiisumik nalinginnaasumik sulilersinnaasimannginneranik nassataqartoq kingusinnerpaamik tamatuma qaangiunneranni ullut qulingiluat qaangiutinnginneranni nalunaarutigineqassaaq.

Imm. 3. Imm. 1 aamma 2 aamma atuuppoq inuussutissarsiornermi nappaatigilikkanut, taamaattorli nalunaaruteqarnissamut piffissarititaq piffissamit nalunaarutiginninnissamut pisussaasup nappaatip inuussutissarsiornermik pissuteqarsorineqarneranik ilisimasaqalerfigisaaniit aallartittumik naatsorsorneqassaaq.

Imm. 4. Arbejdsmarkedets Erhvervssikringi akunnerit 48-t qaangiutsinnagit sulitilluni ajoqusernermik tunngaveqartunik toqusoqarsimaneramik nalunaarfingineqassaaq, matumani ilanngullugu suliffimmi pisimasut toqusut tamarmik. Nalunaaruteqarneq pissaaq sulitilluni ajoquserneq toqunermik kinguneqarsimagaluarpalluunniit, imm. 1-3 malillugit nalunaarutigineqareersimagaluarpalluunniit imaluunniit nalunaarutigineqassappat.

§ 36. Sulilluni ajutoornernik nalunaaruteqartussaaitaavoq sulisitsisoq isumannaarinissamut pisussaaitaasoq, tak. § 52.

Imm. 2. Inuk angerlarsimaffimmi allatulluunniit sulisitsisumit namminermit sulisitaasoq isumannaariffigisaanisamullu pisussaaffiunngitsoq, tak. § 52, imm. 6, pillugu nalunaaruteqarnissaq sulisitsisup pisussaaffigaa.

Imm. 3. Inuk § 52, imm. 2 aamma 4 naapertorlugit imminut isumannaariffigisimasooq aamma inuk § 4, imm. 2, nr. 4-mi pineqartunut ilaasoq nalunaarutigineqassaaq pineqartumit namminermit imaluunniit taassuma qimataanit.

§ 37. Sulisitsisup nalunaaruteqartussaaitaasup, tak. § 36, aammalu inuup imminut isumannaariffigisimasup, tak. § 52, imm. 2 aamma 4, ajoqusernerit Arbejsskadets Erhvervssikringimut nalunaarutigissavaat.

Imm. 2. Imm. 1 taamatuttaaq atuuppoq ajutumeernernut imaattoqartillugu

- 1) isumannaarinnittussaaitaaneq eqquutsinneqarsimanngippat, tak. § 52, imm. 1 aamma 4,

- 2) isumannaarinnittussaataitaasoqanngippat, tak. § 52, imm. 5 aamma 6, imaluunniit
- 3) ajoquserneq § 4, imm. 2, nr. 4-mi pineqartunut ilaappat.

§ 38. Nakorsat kigutillu nakorsaasa inuussutissarsiornermi nappaatigilikkat qularnaatsut taamatullu pasitsaassat, inuussutissarsiornermikkut ilisimalikkatik pillugit Arbejdsmarkedets Erhvervssikringimut aamma Kalaallit Nunaanni Sullivinnik Nakkutilliisoqarfimmut nalunaaruteqartarnissaat pillugu maleruagassat Namminersorlutik Oqartussat isumaqatigiinniarfigereerlugit suliassaqartitsineranut ministerip aalajangersassavai.

§ 39. Nalunaarutit sunik paasisutissartaqarnissaat qanorlu nalunaaruteqartoqartarnissaa pillugit maleruagassat Namminersorlutik Oqartussat isumaqatigiinniarfigereerlugit suliassaqartitsineranut ministerip aalajangersassavai. Sulitilluni ajoqusernerit qarasaasiat aqcutigalugit nalunaarutigineqarsinnaanerit maleruagassiani allassimasinnaavoq.

Imm. 2. Kommunalbestyrelsit aamma sillimmasiisarfiit inatsisip atuutsinneqarnerani peqataanissaat pillugu maleruagassat erseqqinnerusut suliassaqartitsineranut ministerip aalajangersarsinnaavai.

Imm. 3. Sulitilluni ajoqusernerit nalunaarutigineqartarnissaat nakorsallu uppersaaitut oqaaseqaataannik, suliassap suliarineqarnissaani pisariaqartinneqartunik tunniussisoqartarnissaa pillugit maleruagassat suliassaqartitsineranut ministerip aalajangersassavai. Nakorsat uppersaaitut oqaaseqaataasa nakorsallu allagarsiussaasa, tak. imm. 4, akimik aalajangersimasumik qanoq innikkut akilerneqartarnissaat, akillu taassuma annertussusissaa pillugit maleruagassat suliassaqartitsineranut ministerip aamma aalajangersassavai.

Imm. 4. Nakorsat uppersaaitut oqaaseqaataannut, matumani aamma nakorsat immikkut ilisimasallit uppersaaitut oqaaseqaataannut toqumasunillu pilattaalluni misissuinerit pillugit oqaaseqaatinut, aammattaarlu oqaaseqaatinut allagartatigullu uppersaasiussanut allanut, matumani aamma naatsorsuutit kukkunersuisut naatsorsuinerannut pisariaqartunut nutserinermullu aningaasartuutit sillimmasiisarfiup aamma Arbejdsmarkedets Erhvervssikringip akilissavaat.

§ 40 Nalunaarulli piffissaagallartillugu nassiunneqarsimangippat ajoquserup qimagaasulluunniit inatsit malillugu taarsiiffigineqarnissaq sulitilluni ajoqusernermiit ukioq ataaseq qaangiutsinnagu piumasaqaatigisinnaavaat. Inuussutissarsiornermi nappaataalersunut, tak. § 7, tunngatillugu piffissarititaq piffissamit ajoquserup qimagaasulluunniit nappaatip inuussutissarsiummik patsiseqarsorineqarneranik ilisimannilerfianniit naatsorsorneqassaaq. Ajoqusersimasoq sulitilluni ajoqusersimasoq uppersarsineqarpat, tak. § 5, piffissarititaasoq atuutinngitsoortinneqarsinnaavoq, aamma § 14 imaluunniit ajoqusernersup kingunerisaanik §§ 21 – 27 malillugu ajoqusersimasoq imaluunniit sulitilluni qimagaasut taarsiiffigineqarnissaminut pisinnaatitaappata. § 11, imm. 2 aalajangersagaq manna malillugu pissutaasut attuumassuteqarnerisa naliliiffigineqarneranni atuutissanngilaq.

Imm. 2. Pisimasoq nalunaarutigineqartoq pissutsit ajoquserup qimagaasulluunniit pisuussutigisaannik pissuteqartumik suliarineqarsinnaanngippat, inatsit naapertorlugu piumasaqaatit sulitilluni ajoqusernermiit ukiut tallimat qaangiunnerisigut atorunnaassapput.

§ 41 Arbejdsmarkedets Erhvervssikringi suliamik paasisimasalinnik ajoquserfiusumut misissuiartortitsisinnaavoq.

Imm. 2. Arbejdsskadets Erhvervssikring aamma Ankestyrelsi paasisutissanik sunilluunniit Arbejdsskadets Erhvervssikringip pingaaruteqarsorisaanik tunineqarnissartik sulisitsisunut, sulisorisanut, kommuninut susasaqartunullu allanut, matumani aamma napparsimmavinnut, suliffeqarfinnut nakorsanullu suliarinnittunut il.il. piumasarsinnaavaat. Tamakku ilaatigut tassaapput politiinil nalunaarusiaajunnartut, napparsimmavinni ullormut nalunaarsuutit taakkunungalu attuumassutillit, nioqutissiornermi suleriaatsit kiisalu nioqutissiat akoorutissallu sananeqaatsiminni akugisaat pillugit paasisutissat nalunaarusiallu imaluunniit nalunaarusiat, nalunaarsuutit sananeqaatillu nassuiaatitaasa assilineqarneri. Arbejdsmarkedets Erhvervssikringip Kalaallit Nunaanni eqqartuussisarnermik inatsimmi kap. 54 naapertorlugu eqqartuussisutigit killisiuisoqarnissaa piumasarsinnaavaa, taassuma imaqarniliorneqarnera pisinnaalugulu, kiisalu toqusup timaanik pilattaasarneq pillugu inatsisitigit maleruagassat naapertorlugit toqusup timaanik pilattaasoqarnissaa piumasarsinnaallugu, taamaattorli tak. § 12, imm. 2. Paasisutissat qarasaasiat aqcutigalugit piniarneqarsinnaapput.

Imm. 3. Inatsit una malillugu suliarinninnissamut atugassanik Arbejdsmarkedets Erhvervssikringi kommunillu sulitilluni ajoqusernerit piginnaanngorsaaqqiinerillu kiisalu sioqutsilluni pensionisiat suliarineqartarnerannut paasisutissanik katersiffiit pilersinneqartarnerannut paasisutissiiffiqatigiissinnaapput. Paasisutissiiffiqatigiinneq nammeneq aamma innuttaasoq akuersiseqqaarnagu pisinnaavoq.

Imm. 4. Inunnut § 52, imm. 3-mi taaneqartunut tunngatillugu sulitilluni ajoquserneq tassunngalu atatillugu pisimasut pillugit paasisutissanik sukumiisunik umiarsuup allattaaviinut allattuinnisaaq umiarsuup naalagaata pisussaaffigaa.

§ 42 Kalaallit Nunaanni sulitilluni ajoqusernerit pillugit sulianik suliarinninnermi § 41 malillugu paasisutissanik pissarsinissamut akuersissut pissarsiarineqarsinnaavoq, nalunaaruteqartoqarsimaneramik allaganngorlugu

uppernarsaanikkut, ajoqusertoq imaluunniit qimagaasooq paasissutissat qanoq ittut pissarsiarineqassanersut erseqqissaavigineqarpat, tamatumunngalu akerliliisinnaanermut piffissarititamik tunineqarluni.

§ 43 Ajoqusertoq sulitilluni ajoqusernerup pereerneratigut sapinngisamik piaarnerpaamik nakorsamut inummulluunniit peqqinnissaqarfimmi taamatut misissuinissamut piginnaatitaasumut misissortissaaq, tamannalu pereerpat nakorsap imaluunniit Arbejdsmarkedets Erhvervssikringip pisariaqarsorisaatut nakorsamut katsorsartissalluni imaluunniit sungiusaqqinneqassalluni. Ajoqusertoq pisariaqassappat napparsimmavimmi assigisaaniluunniit misissugassatut uneqqusaaguni unissaaq. Ajoqusertoq aammattaaq Arbejdsmarkedets Erhvervssikringip aalajangiinera malillugu nakorsamut Arbejdsmarkedets Erhvervssikringip toqqagaanut misissortissaaq, sulisinnaanermut misilitsissalluni qinnuigineqarnermigullu Arbejdsmarkedets Erhvervssikringimut oqaatsitigut nassuiaateqassalluni. Ajoqusertup aalajangersagaq manna malillugu piumasaqaatit malinngippagit § 12, imm. 1-imi maleruagassaq atuutsinneqassaaq.

Imm. 2. Nakorsamit katsorsarneqarneq il.il. Arbejdsmarkedets Erhvervssikringip imaluunniit Ankestyrelsip piumasaqarnera malillugu pippat ajoqusertoq nakorsamit katsorsarneqarnerminut il.il., tak. imm. 1, atatillugu angalanermut aningaasartuutitut akiliunneqarnissaminut pisinnaatitaavoq. Aammattaaq qimagusimaneq minnerpaamik nalunaaquttap akunnerinik marlunnik sivissuseqarsimappat ajoqusertoq katsorsartinnermini il.il. sulinikkut iluanaarutissaagaluanit annaasanut uppernarsaasikkanut taartisiaqarsinnaatitaavoq, tak. imm. 1, oqaaseqatigiit aappaat pingajuilu. Nalunaaquttap akunnermusiap annerpaaffissaa, ukiumut akissarsianut § 28, imm. 3-mi taaneqartunut naapertuuttoq naatsorsuinerimi tunngavigineqassaaq. Ajoqusernerit pillugit suliassani aningaasartuutit sillimmasiisarfiimmit akilerneqassapput. Inuussutissarsiornermi nappaatigilikkat pillugit suliassani aningaasartuutit Arbejdsmarkedets Erhvervssikringip akilissavai, tak. sulitilluni ajoqusersinnaanermit isumannaarineq pillugu inatsimmi § 55.

Imm. 3. Misissuinermit katsorsaanernullu atatillugu angalanernik najugaqarfinnullu aqqissuussinerimi Arbejdsmarkedets Erhvervssikringi angalatitsisartunik namminersortunik atugaqarsinnaavoq.

Imm. 4. Sillimmasiisarfiup imaluunniit Arbejdsmarkedets Erhvervssygdomsikringip aningaasartuutitik imm. 2 aamma 3 naapertorlugit akiliisussaanerata Arbejdsmarkedets Erhvervssikringip imaluunniit Ankestyrelsip piumasaqaateqarneratigut pinissaanik piumasaqaat sanioqqunneqarsinnaavoq, paasissutissat Arbejdsmarkedets Erhvervssikringip imaluunniit Ankestyrelsip pisariaqartuusorippagit. Sulitilluni ajoqusernermit tunngatillugu suliassani aningaasartuutit ajoqusernerup kingorna pinngortut akilerneqarsimasulluunniit sillimmasiisarfiup taamaallaat akilissavai. Inuussutissarsiornermi nappaatigilikkat pillugit suliassani aningaasartuutit ajoqusernerup nalunaarutigineqarnerata, tak. § 8, imm. 2, kingorna pinngortut akilerneqarsimasulluunniit Arbejdsmarkedets Erhvervssikringip taamaallaat akilissavai.

Imm. 5. Aningaasartuutit imm. 2 aamma 3 naapertorlugit akilerneqarnissaat pillugu maleruagassat Suliassaqartitsinermit ministerip aalajangersassavai, aammalu angalanermut il.il. qanoq annertutigisunik akiliisoqarsinnaanersooq ukiumoortumik nalunaarutigisassallugu.

§ 44 Paasinarsippat ajoquserneq nalunaarutigineqartoq inatsimmi ilaatinneqanngitsoq, tamanna pillugu Arbejdsmarkedets Erhvervssikringi aalajangiissaaq. Sulianut, ajutumeernerit pillugit § 6 malillugu suliarineqartunut, kingusinnerpaamik Arbejdsmarkedets Erhvervssikringip nalunaarummik tigusereernerata kingorna qaammatit pingasut qaangiutsinnagit aalajangiisoqassaaq. Sulianut, inuussutissarsiornermi nappaataalersut allattorsimaffiat pillugit § 7, imm. 1, nr. 1 malillugu suliarineqartunut, piffissaliussaq qaammatit arfiniliupput. Inuutissarsiornermi nappaataalersunut, § 7, imm. 1, nr. 2 aamma § 7, imm. 2 malillugit suliarineqartunut, Erhvervssygdomsudvalgimut saqqummiunneqartussanut, § 15, imm. 1-imi taaneqartoq ukiunik marlunnik piffissarititaasooq taamaallaat atuutinneqassaaq.

Imm. 2. Ajoqusertoq ajoqusernerup nalunaarutigineqareerneratigut toqppat, toqqutaasup inatsimmi pineqartunut ilaatinneqarsinnaaneramik qimagaasunut nalunaaruteqarnissami imm. 1-imi piffissarititat taamatulli atuutissapput. Taamaattoqartillugu piffissarititat toqunerup Arbejdsmarkedets Erhvervssikringimut nalunaarutigineqarneraniit naatsorsorneqassapput.

Imm. 3. Imm. 1 aamma 2 naapertorlugit aalajangiinissaq piffissarititat naannginneranni pisinnaanngippat ajoqusertoq qimagaasulluunniit tamatumunnga ilisimatinneqassapput. Ilisimatitsissut taamaattoq tassaanngilaq aalajangiineq naammagittaalliutigineqarsinnaasooq.

Kapitali 8

*Allaffissorneq**Aalajangiinissamut pisinnaatitaaneq*

§ 45 Arbejdsmarkedets Erhvervssikringip apeqquutit tamaasa inatsit manna naapertorlugu aalajangiiffigisassavai, allatut aalajangiisoqarsimangippat.

Imm. 2. Arbejdsmarkedets Erhvervssikring inatsit manna malillugu sulianik suliarinninnermi illuatungeriit piumasaqaataannik pituttugaanngilaq aamma suliat ataasiakkaat aalajangernissaannut ilitersuutunik pituttorsimangilaq.

Suliassanngortitseqqittarneq

§ 46 Ajoqusertumit imaluunniit qimagaasunit qinnuigineqarnikkut imaluunniit Arbejdsmarkedets Erhvervssikringip iliuuseqarneratigut, ajoquserneq inatsimmi ilaatinneqannginnera pillugu aalajangiineq suugaluartorluunniit aalajangiinnermiit ukiut tallimat iluanni suliassanngorteqqinneqarsinnaavoq. Tamanna aamma sulianut kingusinaartumik nalunaaruteqarsimaneq pissutigalugu itigartitaasimasunut atuuppoq.

Imm. 2. Nappaatip nalunaarutigineqartup inatsimmi ilaatinneqannginnera Arbejdsmarkedets Erhvervssikringip nalunaarutigisimappagu, nappaallu taanna nappaatit allattorsimaffiannut § 7, imm. 1, nr. 1-imi taaneqartumut kingusinnerusukkut ilanngunneqarluni, suliaq Arbejdsmarkedets Erhvervssikringip aalajangiinneraniit ukiut tallimat sinnerlugit qaangiutereersimagaluarpataluunniit suliassanngorteqqinneqarsinnaavoq.

§ 47 Taarsiissuteqarnissamik ajunngitsorsiaqartitsinissamillu apeqquutit, tak. §§-it 14, 21 aamma 22, siullermik aalajangiinnermi tunngavigisat annertuumik allannguuteqarsimappata ajoqusertup qinnuteqarneratigut imaluunniit Arbejdsmarkedets Erhvervssikringip sulissuteqarneratigut, aalajangiinnermiit ukiut tallimat qaangiutinnginneranni suliassanngorteqqinneqarsinnaapput. Suliassanngortitseqqinnissamut piffissaliussaq ukiunik tallimanik piffissaliinerup naannginnerani sivitsorneqarsinnaavoq. Taamaaliornissamut immikkut illuinnartunik pissutissaqartillugu piffissaritit sanioqqunneqarsinnaapput.

Imm. 2. § 21 naapertorlugu ingerlaavartumik tunniuttakkanik pisartagalik pissutsini atugarisamini allannguutit, tunniuttakkat ikililerneqarnissaannik tunniunneqartarunnaarnissaannilluunniit kinguneqarsinnaasorisani sulluunniit pillugit sillimmasiisarfirmut imaluunniit Arbejdsmarkedets Erhvervssikringimut ilisimatitsissuteqartassaaq, soorluttaaq sillimmasiisarfiup aamma Arbejdsmarkedets Erhvervssikringip pisartagallip atugarisaani taamatut allannguuteqarsinnaaneq eqqumaffigissagaa.

§ 48. Qimagaasoq § 24, imm. 1 naapertorlugu taarsiissutunik pisartagaqarsinnaatitaasutut isigineqanngippat, pineqartup tamatuminnaga aalajangiinnermik tigusaqarnerminiit ukiut tallimat qaangiutsinnagit, taarsiissutit pillugit apeqquutit suliassanngorteqqinneqarnissaa qinnutigisinnaavaa. Taamatuttaaq qimagaasup § 24 naapertorlugu, imm. 1, tak. imm. 2, taarsiissutunik pisartagaqartussanngortitaasimasup, ingerlaavartumik tunniuttakkat piffissami aalajangersimasumik sivilissusilimmi tunniunneqartittalernissaat anguniarlugu tunniuttakkat unitsinneqarneranniit ukiut tallimat qaangiutsinnagit suliassanngortitseqqinnissaaq qinnutigisinnaavaa.

Maalaaruteqarsinnaatitaaneq

§ 49. Arbejdsmarkedets Erhvervssikringip § 45 naapertorlugu aalajangiineri ukunanga Ankestyrelsimut suliassanngortinneqarsinnaapput

- 1) ajoqusertumit taassumaluunniit qimataanit,
- 2) ajoqusernemi suliassat pineqartillugit sillimmasiisarfirmut,
- 3) inuussutissarsiornermi nappaatigilikkat pineqartillugit Arbejdsmarkedets Tillægspensionip siulersuisuinit aamma
- 4) sulitilluni ajoqusernerit akuersissutigineqarneri pillugit aalajangiinerit pineqartillugit sulisitsisumit.

Imm. 2. Imm. 1 malillugu maalaaruteqarneq tunniunneqassaaq maalaaruteqartup, tak. imm. 1, nr. 2-4, aalajangiinerup tigorenerata kingorna sapaatit akunneri sisamat qaangiutsinnagit. Ajoqusersimasumut imaluunniit qimagaasunut piffissarititaasoq sapaatit akunneri arfiniliupput. Ajoqusersimasooq imaluunniit qimagaasut Europap avataaniippata, piffissarititaasoq qaammatit pingasuupput.

Imm. 3. Ankestyrelsip naammagittaalliuteqarnissamut killissaritit immikkut ittunik pissutissaqartillugu sanioqqusinnaavai.

Imm. 4. Sulisitsisoq, sillimmasiisarfik imaluunniit Arbejdsmarkedets Tillægspensionip siulersuisui Arbejdsmarkedets Erhvervssikringip aalajangiinneranik Ankestyrelsimut suliassanngortitsippat naammagittaalliuteqarneq kinguartitsigal-larnermik sunniuteqassaaq. Ingerlatsineri inatsimmi kapitali 4 malillugu Arbejdsmarkedets Erhvervssikringip aamma Ankestyrelsip suliaani allagaatini paasitinneqarsinnaatitaanermut Arbejdsmarkedets Tillægspensionip siulersuisui pisinnaatitaaffeqarput.

Imm. 5. Arbejdsmarkedets Erhvervssikringip sulitilluni ajoquserneq pillugu suliami akuerineqarnissamik apeqqu pillugu aalajangiinerimi ajoquser tup nappaataata suussusaa sulisitsisumut ingerlateqqissavaa.

Imm. 6. Ankestyrelsi imm. 1 naapertorlugu naammagittaalliummik suliaqartinnagu Arbejdsmarkedets Erhvervssikringip nalilissavaa naammagittaallior toq tamakkiisumik ilaannakuusumilluunniit tapersissallugu tunngavissaqarnersoq. Taamaattumik naammagittaalliuut Arbejdsmarkedets Erhvervssikringimut nassiuqqassaaq.

Imm. 7. Arbejdsmarkedets Erhvervssikringip naammagittaallior toq tapersinnaanngippagu, naammagittaalliuut aalajangiiner mut tunngavilersuummik nalileeqqinnermillu ilaqartillugu Ankestyrelsimut ingerlateqqinneqassaaq.

Imm. 8. Inatsit manna malillugu aalajangiiffigineqartunut maalaarutinin suliarinninneq pillugu maleruagassanik erseqqinnerusunik Namminersorlutik Oqartussat isumaqatigiinniarfigereerlugit Suliassaqartitsiner mut ministerimut aalajangersarneqassapput.

§ 50. Arbejdsmarkedets Erhvervssikringip §§ 60-65 malillugit aalajangiineri imaluunniit Arbejdsmarkedets Tillægspensionip inatsit manna naapertorlugu aalajangiineri pillugit naammagittaalliuutit aalajangiinerup nalunaarutigineqarneraniit sapaatit akunneri sisamat qaangiutsinnagit Arbejdsmarkedets Tillægspensionip pillugu inatsimmi § 28 naapertorlugu naammagittaalliuuteqartarfi mmut suliaassanngortinneqarsinnaapput pilersinneqarsimasumut.

§ 51. Arbejdsmarkedets Erhvervssikringip § 52, imm. 6-imut aamma § 56-imut atatitaani, § 49-mi taaneqartutuut, Forsikring & Pension sulitilluni ajoqusernerit pillugit suliani naammagittaalliuuteqarsinnaatitaavoq.

Kapitali 9

Sulisitsisoq isumannaarinissamut pisussaaffilik namminersorlunilu inuussutissarsiummik ingerlataqartoq inatsit naapertorlugu imminut isumannaariffigisoq

§ 52 Sulisitsisoq kinaluunniit inunnik § 2-mi taaneqartunik sulisoqartoq inatsit naapertorlugu inunnik taakkuninnga isumannaarinissamut pisussaavoq, taamaattoorli tak. imm. 5 aamma 6. Sulisitsisup isumannaarinninnissamut pisussaaffini sulitilluni ajoqusernerit kingunerisassaannut sillimmaser nermigut, tak. § 54, aammalu inuussutissarsiornermi nappaatigilikkat kingunerisassaannut sillimaniarluni Arbejdsmarkedets Erhvervssikringimut ilanngunnermigut naammassissavaa, tak. § 60.

Imm. 2. Namminersorlutik inuussutissarsiummik ingerlataqartut inatsit naapertorlugu sulitilluni ajoqusernerit kingunerisassaannut imminut isumannaariffigisinnaapput, tak. § 54, aammalu inuussutissarsiornermi nappaatigilikkat kingunerisassaannut sillimaniarlutik Arbejdsmarkedets Erhvervssikringimut ilanngunnermikkut imminut isumannaariffigissapput, tak. § 60.

Imm. 3. Umiarsuarmik Kalaallit Nunaanni angerlarsimaffeqartumik piginnittoq, inunnik § 2-mi pineqartunik, umiarsuup naalagaata umiarsuarmi suliassiisutaanik suliaqartussat sulisussarsiarineqartunik kikkunilluunniit isumannaarinissamut pisussaataitaavoq, pineqartup umiarsuup piginnittuanit allanilluunniit atorfinitsinneqarsimalluniluunniit akissarsiaqartinneqarnera apeqqutaatinnagu, aammalu suliat umiarsuup ingerlanneranut tunnganatik allanut tunngasuugaluarpataluunniit.

Imm. 4. Namminersortutut inuussutissarsiuteqartut, § 69 naapertorlugu atuutilersinneqartunik malitarisassani piumasaqaatinik naammassinnittut, sulisuminnut sillimmasiisussaantit, aamma ingerlatamini nammeneq peqataanermi annertussusia naapertorlugu imminut isumannaariffiginissaminut ataatsimoortunut sillimmasiiner mikkut naammassissavaat, tak. § 67. ataatsimoortunut sillimmasiiner mi isumannaariner mut aamma ilaapput pingaarnertut inuussutissarsiummut attuumassuteqartut saniatigut suliaqarnerit.

Imm. 5. Naalagaaffik, Namminersorlutik Oqartussat kommunillu sulitilluni ajoqusernerit kingunerisassaannut sillimmasiinissamut pisussaanngillat, tak. § 54.

Imm. 6. Isumannaarinissamut pisussaaner mi pineqanngillat nammeneq illugisami ikiortitit sulisorisat, taakkua sulinerat tamarmiisoq qaammatisiutit malillugit ukiumut nalunaaquttap akunnerinit 400-nit annertunerunngippat. Sulisorisat taakku sulisillutik ajoqusernerini aningaasartuutit Arbejdsmarkedets Erhvervssikringimit siumoortumik tunniunneqassapput, qaammatisiutillu malillugit ukiuni tamani sillimmasiisar finnut sulitilluni ajoqusernissamut sillimmasiiffiusartunut tamanut agguanneqartassallutik. Aningaasartuutit Arbejdsmarkedets Erhvervssikringip Finanstilsyni suleqatigalugu, sulitilluni ajoqusersinnaanermut isumannaarineq pillugu inatsimmi § 48, imm. 6, oqaaseqatigiit pingajuat naapertorlugu maleruagassiai naapertorlugit agguanneqartassapput. Sulisorisat taakku inuussutissarsiornermi nappaatigiligaannut aningaasartuutit Arbejdsmarkedets Erhvervssikringimit akilerneqassapput, tak. sulitilluni ajoqusersinnaanermut isumannaarineq pillugu inatsimmi § 55. Sunniutit suunerat qanorlu annertutiginerat piffissallu taakku atuuffiisa siviussusiat eqqarsaatigalugit aningaasartuutit inuussutissarsiummut attuumassuteqarfiannut Arbejdsmarkedets Erhvervssikringip ilanngutissavai.

§ 53 Ajoquser toqartillugu aningaasartuutit sulisitsisup isumannaarinninnissamut pisussaataitaasup sillimmasiisar fianit imaluunniit Ataatsimoortunut Sillimmasiiner mit akilerneqassapput. Inuussutissarsiornermi nappaatigilikkanut

tunngatillugu aningaasartutit Arbejdsmarkedets Erhvervssikringimit akilerneqassapput. Tamanna aamma atuuppoq nammineq piumassutsiminnik § 52, imm. 2 naapertorlugu isumannaarinnittut pineqartillugit. Sunniutit suunerat qanorlu annertutiginerat piffissallu taakku atuuffiisa sivilissusiat eqqarsaatigalugit aningaasartutit inuussutissarsiummut attuumassuteqarfiannut Arbejdsmarkedets Erhvervssikringip ilanngutissavai.

Imm. 2. Sulisitsisoq ajoqusernumut isumannaarinninnissamut pisussaataitaasoq tassaavoq sulisitsisoq, suliffeqarfim-mik suliarititaanilluunniit sulitilluni ajoquserfiusumik ingerlataqartoq, taamaattorli tak. imm. 3 aamma § 52, imm. 3 aamma 6. Sulitilluni ajoquserneq sulisitsisunut arlaqartunut attuumatinneqarsinnaappat Arbejdsmarkedets Erhvervs-sikringip aalajangissavaa sulisitsisoq sorleq isumannaarinninnissamut pisussaataitaanersoq.

Imm. 3. Ajoqusernumut aamma nammineq piumassutsiminnik isumannaarinnittumut inuussutissarsiornermi nappaate-qalersumut sulisitsisoq isumannaarinninnissamut pisussaataitaasoq tassaavoq suliffeqarfimmi, pineqartup nappaate-qalernerata paasineqarnera kingusinnerpaamik sioqqullugu ajoqusiinnaasumik nappaammik pineqartumik kinguneqar-simasorineqartumik sunnertiffigisimasaani sulisitsisoq. Tamannali atuutissanngilaq nappaatip suliffeqarfimmi allami sulineramik pissuteqarnera uppersarsarneqarpat.

Imm. 4. Sulisitsisoq imm. 3 naapertorlugu isumannaarinninnissamut pisussaataitaasoq naammagintumik qularnaas-susilimmik toqqarneqarsinnaanngippat, imaluunniit suliffeqarfik atorunnaarsimappat Arbejdsmarkedets Erhvervs-sikringip aalajangissavaa ajoquserneq suliamut sumut atassanersoq. Suliamut sumut atanermik Arbejdsmarkedets Erhvervssikringip aalangiinissaa, ajoquserup namminerluunniit piumassutsiminnik isumannaarinnittup sunnigaaneri nappaammik pineqartumik kinguneqarsorineqartut suliami sumi pisamanerunerannik naliliilluarnikkut pissaaq. Naliliinermi tunngavigisanut ilaatinneqassapput sunniutit suunerat, qanoq annertutiginerat piffissarlu taakkua atuuffiat.

Imm. 5. Ajoquserneq inuit isumannaariffigineqartut inuit inuunerannik annaassiniarnerisa kingunerisaanik pisimappat, tak. § 4, nr. 3, sillimmasiisarfiup imaluunniit Arbejdsmarkedets Erhvervssikringip tunniussimasai naalagaaffiup karsianit utertinneqassapput.

Imm. 6. Inuk inatsit naapertorlugu isumannaariffigineqarsimanngitsoq inuup inuuneranik annaassiniartilluni ajoquserpat, tak. § 4, nr. 2, inatsit naapertorlugu tunniunneqarsimasut naalagaaffiup karsiata akilissavai.

Imm. 7. Pisuni imm. 5-imi 6-imilu pineqartuni ajoquserup ukiumut akissarsiai inatsimmi maleruagassat nalinginnaasut naapertorlugit naatsorsorneqassapput.

Imm. 8. Ajoqusernerit inuiaqatigiinnik kiffartuussinerup imaluunniit kommunimi qinigaaneq tunngavigalugu sulinerup kingunerisai ajoqusertoqartillugu inatsit naapertorlugu tunniunneqarsimasut naalagaaffimmit, Namminer-sorlutik Oqartussanit kommuninillu akilerneqassapput. Inuussutissarsiornermi nappaateqartoqalersillugu ajoqusernut taamaattunut inatsit naapertorlugu tunniunneqartartut Arbejdsmarkedets Erhvervssikringip akilissavai, tak. sulitilluni ajoqusersinnaanermut isumannaarineq pillugu inatsimmi § 55.

Kapitali 10

Isumannaarinnissamut pisussaataitaaneq

Sulitilluni ajutoornerit

§ 54 Sulisitsisut isumannaarinninnissamut pisussaataitaasut, tak. § 52, imm. 1 aamma 3, aamma nammineq piumassutsiminnik § 52, imm. 2 naapertorlugu isumannaarinnissimasut ajoqusernissamut aarlerinaateqarsinnaasunut pisussaaffitik sillimmasiisarfiimmut, inatsit manna naapertorlugu ajoqusernissamut sillimmasiisarfiusumut nuussavaat, Ataatsimoortunut Sillimmasiinermit ilaasortaannngikkunik, tak. §§-it 67-69.

§ 55 Sulisitsisoq inatsit malillugu sillimmasiisussaagaluarluni sillimmasiinngitsoq sillimmasiisummilluunniit taamaattumik atuutsitsinngitsoq sillimmasiisarfiimmut akiliutissamut akilerneqarsimasussaagaluartumut naapertuuttumik akiliuteqassaaq. Akiliutissap annertussusissaa Arbejdsmarkedets Erhvervssikringip aalajangissavaa. Aningaasat Arbejdsmarkedets Erhvervssikringimut akilerneqassapput, maleruagassallu Arbejdsmarkedets Erhvervssikringip Finanstilsyni suleqatigalugu aalajangersagai naapertorlugit Kalaallit Nunaanni sillimmasiisarfiinut sulitilluni ajoqusersinnaanermut sillimmasiiffiusartunut tamanut pisassanngortinneqassallutik, sulitilluni ajoqusersin-naanermut isumannaarineq pillugu inatsimmi § 51 naapertorlugu. Sulisitsisup aningaasat akiligassanngorsimasut akilinngippagit Kalaallit Nunaanni eqqartuussisarnermik inatsimmi kap. 7-imi maleruagassat naapertorlugit akilersinniarneqarsinnaapput.

§ 56 Sulitilluni ajoqusertoqarsimappat sulisitsisullu isumannaarinninnissamut pisussaaffini sillimmasiinermit naammassimannngippagu, Arbejdsmarkedets Erhvervssikringip aningaasartutit § 10-mi, § 39, imm. 3-mi 4-imilu aamma §§-ini 43-mi 64-imilu taaneqartut siuimoortumik akilissavai.

Imm. 2. Sulisitsisup aningaasat tunniunneqarsimasut, tak. imm. 1, Arbejdsmarkedets Erhvervssikringimut utertissavai, sulisitsisoq tamakkiisumik ilaannakuusumilluunniit akiliuteqanngitsoortitaanissamut utoqqatsissutissaqar-

tutut Arbejdsmarkedets Erhvervssikringip isumaqarfigingippagu. Arbejdsmarkedets Erhvervssikringip aningaasat Kalaallit Nunaanni eqqartuussisarnermik inatsimmi immikkoortoq VIII-imi maleruagassat naaportorlugit akilersinniarsinnaavai.

Imm. 3. Arbejdsmarkedets Erhvervssikringip naleqquttuosorinninnini naaportorlugu sulisitsisoq aningaasanik akiligasaanik isumakkeerfigisinnaavaa.

Imm. 4. Aningaasat Arbejdsmarkedets Erhvervssikringip imm. 1 naaportorlugu tunniussimasai § 52, imm. 6, oqaaseqatigiit aappaanni pingajuinilu maleruagassat naaportorlugit, aningaasanik imm. 2 naaportorlugu utertinneqarsimajunnartunik ilanngarlugit sillimmasiisarfinnut sulitilluni ajoqusersinnaanermut sillimmasiiffiusartunut tamanut agguanneqassapput.

Imm. 5. Suliffeqarfik sulitilluni ajoquserfiusoq atorunnaarsimappat, sillimmasiisarfirmillu toqqaasoqarsinnaanngippat imm. 1-imi 4-milu maleruagassat taamatuttaaq atuutsinneqassapput.

§ 57 Sillimmasiisarfiup sulisisitsisup isumannaarinninnissamut pisussaatitaasup namminersorluniluunniit inuussutisarsiummik ingerlataqartup akisussaaffigisinnaasai tigusimagunigit, tak. § 54, sillimmasiisarfik akiliisussanngussaaq, sillimmasiineq pillugu isumaqatigiissuteqarnermi akisussaaffigisassat suuneri annertussusiilu pillugit naatsorsuutigisassat eqqunngitsut tunngavigineqarsimagaluarpataluunniit.

§ 58 Sulitilluni ajoqusersinnaanermut inatsisit malillugit sillimmasiisussaananermut akiliutissat piffissaq eqqorlugu akilernerqarsimangippata sillimmasiisarfiup aningaasat Kalaallit Nunaanni eqqartuussisarnermik inatsimmi immikkoortoq VIII-imi maleruagassat naaportorlugit akilersinniarsinnaavai.

§ 59 Sulitilluni ajoqusersinnaanermut sillimmasiissutit aningaasarsiornermik ingerlataqarneq pillugu inatsimmi § 250, imm. 2 naaportorlugu imaluunniit aningaasarsiornermik ingerlataqarneq pillugu inatsisip Kalaallit Nunaanni atuutlernissaanik pillugu peeqqussut nr. 1252, 15. december 2004-meersumi § 275, imm. 2 naaportorlugu Arbejdsskadeystrelisimit aqutassanngortinneqarsimappata, ajoqusernerit, ullup sillimmasiisarfiup atorunnaarfiata kingornatigut sillimmasiisarfirmut nalunaarutigineqartut tamarmik Arbejdsmarkedets Erhvervssikringimut nassiunneqassapput. Tamatumunnga peqatigitillugu aningaasaatit sillimmasiisarfiup, aningaasarsiornermik ingerlataqarneq pillugu inatsit naaportorlugu immikkoortissimasai, sillimmasiisarfiullu atorunnaarnerata nalaani inatsit naaportorlugu sillimmasiissutitut pigisaanut tunngasuusut Arbejdsmarkedets Erhvervssikringimut tunniunneqassapput.

Imm. 2. Sillimmasiissutit aqunneqarnerannut atatillugu aningaasartuutit Arbejdsmarkedets Erhvervssikringimit siuimoortumik tunniunneqartassapput, qaammatsiutillu malillugit ukiuni tamani sillimmasiisarfinnut, sulitilluni ajoqusersinnaanermut sillimmasiiffiusartunut tamanut, sulitilluni ajoqusersinnaanermut isumannaarineq pillugu inatsimmi § 48, imm. 6, oqaaseqatigiit aappaanni pingajuannilu maleruagassat naaportorlugit agguataarneqassallutik. Aningaasaatit tunniunneqarsimasut maleruagassat taakku malillugit agguataarneqassapput.

Inuussutissarsiornermi nappaatigilikkat

§ 60 Sulisitsisut isumannaarinninnissamut pisussaatitaasut, tak. § 52, aamma nammineq piunassutsiminnik § 52, imm. 2 naaportorlugu isumannaarinnittut Arbejdsmarkedets Erhvervssikringimut akiliuteqartassapput, tak. § 66, Ataatsimoortunut Sillimmasiinermit ilaasortaanngikkunik, tak. §§ 67-69.

Imm. 2. Arbejdsmarkedets Erhvervssikringi sulisitsisumut isumannaarinninnissamut pisussaatitaasumut namminersorluniluunniit inuussutissarsiummik ingerlataqartumut akisussaaffigisinnaasanik tigusisimappat Arbejdsmarkedets Erhvervssikringi akiliisussanngussaaq, akisussaaffigisassat suuneri annertussusiilu pillugit naatsorsuutigisassat eqqunngitsut tunngavigineqarsimagaluarpataluunniit.

Imm. 3. Isumannaarinninnissamut pisussaatitaasooq, sillimmasiisarfik pisortallu oqartussaasut qinnuigineqarnermikkut inatsit naaportorlugu akiliutissat annertussuilerneqarnissaannut pingaarutilinnik paasissutissanik Arbejdsmarkedets Erhvervssikringimut tunniussissapput. Tamanna aamma atuuppoq nammineq piunassutsiminnik § 52, imm. 2 naaportorlugu isumannaarinnittunut. Paasissutissanik Arbejdsmarkedets Erhvervssikringimut tunniussisussaatitaaneq atuutinngilaq nipangiussisussaatitaaneq inatsisiliornikkut allatigut immikkut aalajangersaavigineqarsimappat.

Imm. 4. Akiliutissat akilersinniarnanermut aamma inuussutissarsiornermi nappaatigilikkat pillugit nalunaarutit suliarineqarnissaannut atugassatut Arbejdsmarkedets Erhvervssikringip, Arbejdsmarkedets Tillægspensionip sulisitsisunut inunnullu nalunaarsuiffiani paasissutissat, Arbejdsmarkedets Tillægspensionip ATP-mut akiligassiissutitut sulisitsisut akilersimasaannik allattorsimaffiutaani paasissutissat kiisalu sulisitsisunut tunngasunik aamma Arbejdsmarkedets Tillægspensionip akissarsioritut nalunaarsuiffiani inuit ATP-mut akiliutigisimasaat pillugit paasissutissat qarasaasiat aqutugalugit pissarsiarisinnaavai.

§ 61 Arbejdsmarkedets Erhvervssikringip siulersuisuisa inassuteqarnerisigut suliassaqartitsinermit ministerip akiliutissat akilernissaat, matumani aamma akiliinissamut piffissarititaq, pillugit maleruagassat erseqinnerusut

aalajangersassavai. Maleruagassiatigut taakkunuunatigut aalajangerneqarsinnaavoq Arbejdsmarkedets Erhvervssikring akiliutissat akilerneqannginnerat pissutigalugu suliarinninnermut akileeqqusisinnaasoq aammalu akiliutissanik kinguartsisinnaasoq kiisalu akiliutissat, erniat suliarinninnermullu akiliutissat akilerneqarnissaannik isumakkeerinnis-sinnaasoq.

Imm. 2. Akiliutissat piffissaatillugu akilerneqanngippata isumannaarinninnissamut pisussaataaasoq aammalu nammineq piumassutsiminik § 52, imm. 2 naapertorlugu isumannaarinnittoq akiliutissat ullormit akilerneqartus-sanngorfianniit erniaannik, kingusinaarluni akiliinnermi il.il. ernialersuisarneq pillugu inatsit naapertorlugu sukkul-luunniit annertussilerneqartartunik, akiliissaq.

Imm. 3. Akiliutissat piffissaatillugu akilerneqanngippata aningaasat Arbejdsmarkedets Erhvervssikringip, Kalaallit Nunaanni eqqartuussisarnermik inatsimmi immikkoortoq VIII-imi maleruagassat naapertorlugit akilersinniarsinnaavai.

Imm. 4. Piumasarisat Arbejdsmarkedets Erhvervssikringip kapitali manna naapertorlugu pisassarisai, pisassarisat ilaasa pisoqalisootarnerannik inatsimmi nr. 274, 22. december 1908-meersumi, pigisanut tunngatillugu eqqartuussisarnermi inatsisit il.il. ilaasa Kalaallit Nunaanni atuuttussanngortinneqarnerat pillugu inatsisikkut nr. 104, 31. marts 1965-imeersukkut atuutilersinneqarsimasumi maleruagassat naapertorlugit pisoqalisassapput.

Imm. 5. Arbejdsmarkedets Erhvervssikringi Kalaallit Nunaanni akileraartarnermut oqartussaasunit aammalu Namminersorlutik Oqartussani oqartussaasunit allanit, isumannaarinninnissamut pisussaataaasoq aamma nammineq piumassutsiminik § 52, imm. 2 naapertorlugu isumannaarinnittoq pillugit paasissutissanik, akiligassat akilinngitsuukkat, erniat suliarinninnermullu akiliutissat akilersinniarneqarnissaannut pisariaqartinneqartunik, matumani aamma aningaasarsianut pigisanullu tunngasut pillugit paasissutissanik pissarsiniarsinnaavoq.

§ 62 Inuussutissarsiornermi nappaateqartoqalersimappat sulisitsisorlu isumannaarinninnissamut pisussaataaasoq akiliutissamik akiliisimanngippat Arbejdsmarkedets Erhvervssikringip, tak. sulitilluni ajoqusersinnaanermut isumannaarineq pillugu inatsimmi § 55, aningaasartuutit § 10-mi, § 39, imm. 3-mi 4-imilu aamma §§-ini 43-mi 64-imilu taaneqartut siuomortumik akilissavai.

Imm. 2. Sulisitsisup aningaasat tunniunneqarsimasut Arbejdsmarkedets Erhvervssikringimut utertissavai, tak. imm. 1, pineqartup tamakkiisumik ilaannakuusumilluunniit akiliuteqanngitsoortitaanissamut utoqqatsissutissaqarnera Arbejds-markedet Erhvervssikringimit nalilerneqanngippat.

Imm. 3. Arbejdsmarkedets Erhvervssikringip naapertuuttuosorinninnini naapertorlugu sulisitsisoq aningaasat akilernissaannik isumakkeerfigisinnaavaa.

Imm. 4. Aningaasat Arbejdsmarkedets Erhvervssikringip imm. 1 naapertorlugu akilersimasai § 52, imm. 6, oqaaseqatigiit sisamaanni tallimaannilu maleruagassat naapertorlugit, aningaasat imm. 2 naapertorlugu utertissutaa-simasinnaasut ilanngaatalugit agguataarneqassapput.

Imm. 5. Imm. 2 naapertorlugu utertitassatut piumasarisat, taakku § 65 naapertorlugu erniaat piffissaatillugu akilerneqanngippata aningaasat Arbejdsmarkedets Erhvervssikringip, Kalaallit Nunaanni eqqartuussisarnermik inatsimmi aningaasanik pisassanik akiliisitsiniaaneq pillugu immikkoortoq VIII malillugu akilersinniarneqarsinnaapput. Taamatutaaq § 61, imm. 5-imi maleruagassaq atuutisneqassaaq.

§ 63 Arbejdsmarkedets Erhvervssikringimut akiliutissat tamarmiusut aalajangersarneqarnerat pillugu sulitilluni ajoqusersinnaanermi isumannaarineq pillugu inatsimmi §§ 58-58 c-mi malittarisassat, tak. Suliffeqarfiit Inuussutis-sarsiornermi isumannaarineq pillugu inatsimmi § 3, matumani inatsit malillugu sulisitsisut isumannaarinninnissamut pisussaataasunut atuutissapput.

Aqutsinnermut akiliuteqarneq ernialiinerillu pillugit ataatsimut aalajangersakkat

§ 64 Arbejdsmarkedets Erhvervssikringip aamma Ankestyrelsip inatsimmut ilaasunik pissutsinik aqutsinerat ukuninnga aningaasalersorneqarpoq:

- 1) Sulitilluni ajoquserneq pillugu suliat pineqartumut tunngasut eqqarsaatigalugit sillimmasiisarfiit sulitilluni ajoqusersinnaanermut sillimmasiiffiusartut,
- 2) Inuussutissarsiornermi nappaatigilikkat nalunaarutigineqartut pillugit suliat eqqarsaatigalugit inuussutissarsiornermi nappaatigilikkanani aningaasartuutit aningaasalersornerisa ilaannut Arbejdsmarkedets Erhvervssikringi, tak. sulitilluni ajoqusersinnaanermi isumannaarineq pillugu inatsimmi § 55 aamma
- 3) Nammineq isumannaarinnermut periarfissaqartunut Naalagaaffik, Namminersorlutik Oqartussat kommunillu, tak. § 52, imm. 5.

Imm. 2. Allafissornermut akiliutit suliamut nalunaarutigineqartumtu ataatsimut akigititaq tunngavigalugu naatsorsor-neqassapput. Siullermeerluni nalunaarutit kiisalu suliareqqinneqartunut aamma Arbejdsmarkedets Erhvervssikringip suliani aalajangiiffigeriigaani nutarterneqartussatut aalajangiiffigisaanik suliarinninnermut akiliisoqassaaq.

Imm. 3. Suliassaqartitsinermut ministerip sillimmasiisarfiit imm. 1, nr. 1-imi taaneqartut kisitsisinngorlugit paasissutissanik assigisaannillu pissarsiniaqqullugit peqqusinnaavai.

Imm. 4. Akiliisarneq, akigititat annertussusaat taakkuninngalu akileeqqusineq pillugu maleruagassanik suliassaqartitsinermut ministeri aalajangersaassaaq, matumunga ilanngullugu Ankestyrelsi pillugu maleruagassat eqqarsaatigalugit isumaginninnermut nunamullu namminermt ministeri isumaqatigiinniarfigereerlugu. Arbejdsmarkedets Erhvervssikringimut siulersuisut inassuteqarnerisigut akigititat annertussusaat ukiumut ataasarluni suliassaqartitsinermt ministerip nalunaarutigissavai, matumunga ilanngullugu Ankestyrelsi pillugu maleruagassat eqqarsaatigalugit isumaginninnermt nunamullu namminermt ministeri isumaqatigiinniarfigereerlugu.

§ 65 Aningaasat Arbejdsmarkedets Erhvervssikringip § 30, imm. 2, aamma § 52, imm. 6 aamma § 56, imm. 1 aamma 5 aamma § 62 naapertorlugit siumoortumik akilerallarsimasaat ukiumoortumik ernianik, aningaasat niuerutigiiissutaaneranni Nationalbankip ullormiit ullormut ernialiuuttagaasa agguaqatigiissinnerannut naapertuuttunik ernialersorneqassapput. Erniat sulitilluni ajoqusersinnaanermut isumannaarineq pillugu inatsimmi § 60, imm. 1 naapertorlugu suliassaqartitsinermt ministerimit maleruagassiat aalajangersarneqartut naapertorlugit naatsorsorneqassapput.

§ 66 Suliffeqarfinni Inuussutissarsionermi isumannaarineq pillugu sulitilluni ajoqusernermi isumannaarineq pillugu inatsimmi kapitali 11-imi maleruagassat taamaaqataanik atorneqassapput.

Ataatsimoortunut sillimmasiineq

§ 67 § 52, imm. 4-mi taaneqartunut sulisitsisunut sulisuinullu, taakkununnga ilanngullugit aappaasut suleqataasut ataatsimoortunut sillimmasiinermti Arbejdsmarkedets Erhvervssikringi sillimmasiisuuvoq.

Imm. 2. Umiarsuarnik 15 meterinik takinerusunillu piginnittut ataatsimoorluni sillimmasiinermti ilaasortaasinnaangillat.

Imm. 3. Taamaaqataanik § 57 ataatsimoorluni sillimmasiinermti atorneqarpoq.

§ 68 Inuit ataatsimoortunut sillimmasiinermti ilaatinneqartut akiliutissaasa annertussusissaat, Arbejdsmarkedets Erhvervssikringimi siulersuisuniit inassuteqarneratigut Namminersorlutillu Oqartussanik isumaqatigiinniareernikkut suliassaqartitsinermti ministerip aalajangersassavai.

Imm. 2. Akiliutitut akilerneqartut taarsiissutissatigut pisussaaffinnik matusissutaasinnaangippata aningaasat amigaataasut Naalagaaffimmit akilerneqassapput.

Imm. 3. Naalagaaffik suliffeqarfinnut inunnit ataasiakkaanit ingerlanneqartunut sulitilluni ajoqusersinnaanermut sillimmasiinermti akiliutissaannik appartitsinissamut tapiissuteqartassaaq. Tapiissutit sulisitsip imminnermti sillimmasiineranumut aamma suliffeqarfimmi sulisut sillimmasernissaannut tunniunneqassapput.

Imm. 4. Tapiissutit, tak. imm. 3, akiliutissap 2/5-iisut annertutigisut maleruagassat suliassaqartitsinermti ministerip aalajangersagai naapertorlugit tunniunneqartassapput.

§ 69 Suliassaqartitsinermti ministerip ataatsimoortunut sillimmasiinermti ilaasortaanermti kiisalu akiligassanik akiliisitsiniartarneq kiisalu ataatsimoortunut sillimmasiinermti ilanngunneq pillugit maleruagassat Namminersorlutik Oqartussat isumaqatiginiareerlugu aalajangersassavai.

Kapitali 11

Aalajangersakkat assigiinngitsut

§ 70 Inatsit naapertorlugu pisartagarititat ajoqusiisumut, ajoquserumut taassumaluunniit qimataanut taarsiisussanngortitaasimasumut akilersinniarneqarnissaat piumasarineqarsinnaangilaq. Ajoquserumut taassumaluunniit qimataanut inatsit manna naapertorlugu pisartagaritinneqartut akilerneqarsimappata akilerneqarnissaannulluunniit pisussaataasooqarpat, pineqartut taarsiissuteqartussaatitaasumut piumasaaqaataat ikililerneqassapput.

§ 71 Isumannaarinninnissamut pisussaataasup aammalu tunineqarsinnaatitaasup akornanni isumaqatigiissutit atuussinnaatitaassanngillat inatsimmi aalajangersakkat atuutinnginnissaannik, imaluunniit tunineqarsinnaatitaasut sillimmasiinermti akiliutissamik sillimmasiisarfirmut imaluunniit akiliutissamik Arbejdsmarkedets Erhvervssikringimut, tak. sulitilluni ajoqusersinnaanermut isumannaarineq pillugu inatsimmi § 55, isumannaarinninnissamut pisussaataasup inatsit naapertorlugu akiligassarisaanik akiliuteqarnissaannik, imaluunniit pinngitsoorani pisartagassat inatsit naapertorlugu naatsorsorneqannginnissaannik kinguneqassappata kinguneqarpataluunniit. Taamatuttaaq inatsit naapertorlugu isumannaarinnissaq pissutigalugu akissarsianit uninngatitsinissamik isumaqatigiissutaasimasut atuussinnaatitaanngillat.

§ 72 Suliassaqartitsinermit ministerip naalagaaffiit allat isumaqatigiissuteqarfigereerlugit, inatsimmi aalajangersakkat imaluunniit Naalagaaffiup allap taassuma tamakkununga inatsisaataasa pissutsinut inatsimmi aalajangersarneqartunut qanoq annertutigisumik atuutsinneqarnissaat pillugu maleruagassat aalajangersarsinnaavai.

§ 73 Arbejdsmarkedets Tillægspensionip sulisui, matumani aamma nakorsat siunnersortigisagai, Arbejdsmarkedets Erhvervssikringimi ikiortitut sulisut aamma naammagittaalliutinik suliarinnineq eqqarsaatigalugu suliassanik isumaginnittut sulisut, tak. § 49, imm. 1, nr. 3, sillimmasiisarfimmi atorfeqartuusinnaanatilluunniit siulersuisooqataasinnaangillat.

§ 73 a. Tjenestemandit sulisullu, ataatsimoorussamik isumaqatigiissut imaluunniit pisortani oqartussanit aalajangersarneqartunik akuerisaasunilluunniit akissarsiatigut sulinermilu pissutsit pillugit aalajangersakkat malillugit atorfeqartut, imaluunniit immikkut isumaqatigiissuteqarlutik Kalaallit Nunaanni sulitilluni ajoqusernermut sullisivimmi atorfeqartut imaluunniit suliffeqartut, taamaallaallu annerusumilluunniit Arbejdsmarkedets Erhvervssikringimut sulissanik tunniunneqartunik isumaginnittut, piffissamiit Arbejdsmarkedets Erhvervssikringimut suliassanik tunniussinerminniit naalagaaffimmi atorfeqarnertik pigiinnassavaat manna tikillugu piumasaaqatitut naapertuuttut assigalugit, aamma Arbejdsmarkedets Tillægspensionimi kiffartuussinissamut pisussaaffeqarlutik.

Imm. 2. Suliasst tunniunneqarneranniit imm. 1-imi ilaasunut sulisunut atorfinitsitsinermit oqartussatut isumaginninnermut Suliassaqartitsinermit ministerip aningaasartuutai Arbejdsmarkedets Tillægspensionimit matussuserneqassapput.

§ 74 Arbejdsmarkedets Erhvervssikringip qinnuigineqarnermigut aammalu inatsimmi matumani aalajangersakkanik atuilluni, inunnik ajoqusiinermit tunngasutigut apeqqutit inatsimmi pineqanngitsut pillugit oqaaseqaateqartarsinnaavoq. Arbejdsmarkedets Erhvervssikringi taamatuttaaq taarsiissutissat pillugit akisussaassuseqarnermik inatsisip Kalaallit Nunaanni atuutilersinneqarneranik peqqussummi § 10 naapertorlugu oqaaseqaateqartarsinnaavoq.

Imm. 2. Oqaaseqaatinut taamaattunut akiliummik Arbejdsmarkedets Erhvervssikringimiit inassuteqarneratigut suliassaqartitsinermit ministerip annertussuligaanik akiliuteqartoqartassaaq.

§ 75 Sulisitsisoq isumannaarinninnissamut pisussaataitaasoq sillimmasiinngitsoq imaluunniit Arbejdsmarkedets Erhvervssikringimut ilanngutinngitsoq akiliisussanngortitaasinnaavoq.

Imm. 2. Sulisitsisoq isumannaarinninnissamut pisussaataitaasoq sillimmasiinermik atuutsitsinngitsoq imaluunniit Arbejdsmarkedets Erhvervssikringimut akiliutissanik akiliinngitsoq akiliisussanngortitaasinnaavoq.

Imm. 3. Sulisitsisoq isumannaarinninnissamut pisussaataitaasoq sulitilluni ajoqusernermik piffissaagallartillugu nalunaaruteqanngitsoq imaluunniit sulitilluni ajoquserneq nalunaarutigineqarsimasooq pillugu paasissutisseeqataajumangitsoq, tak. kapitali 7, akiliisussanngortitaasinnaavoq.

Imm. 4. Unioqqutitsinerit aktieselskabinit, andelselskabinit, anpartsselskabinit assigisaannilluunniit unioqqutitsinerusut selskabimut namminermit akiliisitsissutaasinnaapput.

Imm. 5. Unioqqutitsineq Naalagaaffimmit, Namminersorlutik Oqartussanit, kommunimit kommunilluunniit suleqatigiiffianit unioqqutitsineruppat Naalagaaffik, Namminersorlutik Oqartussat, kommuni kommunilluunniit suleqatigiiffiat akiliisitaanissamut akisussaaffilerneqarsinnaapput.

Kapitali 12

Atuutilersitsinermit ikaarsaarnermilu aalajangersakkat

§ 76. Inatsit ulloq 1. januar 2011-imi atuutilissaaq.

Imm. 2. Inatsit atorneqassaaq

- 1) sulitilluni ajoqusernermut ulloq 1. januar 2011-imi taassumaluunniit kingorna pisunut, aamma
- 2) inuussutissarsiornermi nappaatigilikkanut ulloq 1. januar 2011-imi taassumaluunniit kingorna nalunaarutigineqartunut.

Imm. 3. Inatsisip matuma atuutileramera ilutigalugu Kalaallit Nunaanni sulitilluni ajoqusernerit kingunerisassaannut isumannaarineq pillugu inatsisip atuutilersinneqarneranik peqqussut nr. 991, 3. oktober 2008-imeersoq atorunnaarsinneqassaaq.

Imm. 4. Peqqussut, tak. imm. 3, suli ukunani atorneqassaaq

- 1) ajoqusernermut, ulloq 1. januar 2011 sioqqullugu pisut, aamma
- 2) inuussutissarsiornermi nappaatigilikkanut ulloq 1. januar 2011 sioqqullugu nalunaarutigineqarsimasunut.

Imm. 5. Inatsisip atuutilererneratigut aningaasat §§-ini 22-mi, 23-mi aamma 28, imm. 3-mi, 4-mi aamma 5-imi allassimasut § 29 naapertorlugu iluarsivigineqassapput. Arbejdsskadestyrelsip pisortaata naleqqusaanerit suut pissanersut nalunaarutigissavaa.

§ 77. Kalaallit Nunaanni ajutumeernerup kingunerisaanik sillimmasiineq pillugu inatsisip atuutilernissaanik peqqussut nr. 42, 2. februar 1962-imeersoq malillugu ullormusiat ingerlaavartumillu erniat, tunngaviumik erniat 1. april 1984-imi atuuttut malillugit 197,8 pct.-inut aalajangerneqassapput, tak. peqqussummi nr. 103, 19. marts 1984-imeersumi § 44 B.

Imm. 2. Ajoqusernerit 1. januar 1980-ip aamma 31. marts 1984-ip akornanni pisimasut, Kalaallit Nunaanni sulitilluni ajoqusersinnaanermi isumannaarineq pillugu inatsisip atuutilersinneqarnera pillugu peqqussut 558, 28. december 1979-imeersoq malillugu tunngaviumik tunniunneqartartut 1. april 1984-imi atuuttut malillugit 197,8 pct.-inut aalajangerneqassapput, tak. § 44 A, peqqussut nr. 103, 19. marts 1984-imeersoq.

Imm. 3. Ajoqusernerit 1. april 1984-ip aamma 31. marts 1988-ip akornanni pisimasut kingunerisaannik, sulitilluni ajoqusernissamut sillimmasiisarneq pillugu Kalaallit Nunaannut peqqussut nr. 558, 28. december 1979-imeersoq naapertorlugu ullormusiat aamma ingerlaavartumik tunniunneqartartut tunngaviumik akissarsianut naapertuuttut 197,8 pct.-iannut aalajangerneqassapput.

Imm. 4. Sulitilluni ajoqusernissamut sillimmasiisarneq pillugu Kalaallit Nunaannut peqqussut nr. 145, 16. marts 1988-imeersoq naapertorlugu ullormusiat aamma ingerlaavartumik tunniunneqartartut, tunngaviumik akissarsianut naapertuuttut 197,8 pct.-iannut aalajangerneqassapput.

Imm. 5. Kalaallit Nunaanni sulitilluni ajoqusernerup kingunerisassaannut isumannaarineq pillugu inatsisip atuutilersinneqarneranik peqqussut nr. 818, 11. september 1996 naapertorlugu ullormusiat aamma ingerlaavartumik tunniunneqartartut, tunngaviumik akissarsianut naapertuuttut 197,8 pct.-iannut aalajangerneqassapput.

Imm. 6. Kalaallit Nunaanni sulitilluni ajoqusernerup kingunerisassaannut isumannaarineq pillugu inatsisip atuulersinneqarneranik peqqussut nr. 273, 24. april 2001-imeersoq naapertorlugu ullormusiat aamma ingerlaavartumik tunniunneqartartut tunngaviumik akissarsianut naapertuuttut 197,8 pct.-iannut aalajangerneqassapput.

Imm. 7. Kalaallit Nunaanni sulitilluni ajoqusernerup kingunerisassaannut isumannaarineq pillugu inatsisip atuulersinneqarneranik peqqussut nr. 991, 3. oktober 2008-meersoq naapertorlugu ullormusiat aamma ingerlaavartumik tunniunneqartartut tunngaviumik akissarsianut naapertuuttut 108,1 pct.-iannut aalajangerneqassapput.

Imm. 8. Ullormusiat, erniat aamma ingerlaavartumik tunniunneqartartut, tak. imm. 1-7, inatsimmi matumani § 29 naapertorlugu iluarsivigineqassapput.

§ 78 Nalunaarutit, Kalaallit Nunaanni sulitilluni ajoqusersinnaanerpup kingunerisaanik isumannaarineq pillugu inatsisip atuutilersinneqarnissaanik peqqussut nr. 273, 24. april 2001-imeersoq, aamma Kalaallit Nunaanni sulitilluni ajoqusersinnaanermi isumannaarineq pillugu inatsisip atuutilersinneqarnissaanik peqqussut nr. 991, 3. oktober 2008-meersoq naapertorlugit atuutilersinneqartut atuutiinnassapput atorunnaarsinneqarnissaasa imaluunniit allanngortinneqarnissaasa tungaanut.

§ 79 Sillimmasiissutini pisinnaatitaasoq sillimmasiissusaatitaasoq sillimmasiissutini, peqqussut nr. 991, 3. oktober 2008-meersoq naapertorlugu sillimmasersimasup, atorunnaarsissinnaanngilaa, akiligassat qaffannerat pissutigalugu, inatsisip matumap malitsigisaanik aningaasartuutit qaffannerannik taamaallaat tunngavilersugaasoq.

§ 80 Sulitilluni ajoqusersinnaanermut sillimmasiineq pillugu inatsimmi, tak. inatsisikkut nalunaarut nr. 848, 7. september 2009-meersoq, kingullermik inatsit nr. 718, 25. juni 2010-imi § 18-inikkut allanngortinneqarsimasoq, makku allanngortinneqassapput:

1. § 90 ima oqaasertaliorneqassaaq:

»§ 90. Inatsit Savalimmiunut aamma Kalaallit Nunaannut atuutissanngilaq.«

Inatsit nr. 1568, 15. december 2015-imeersoq atuutilersinnerani aalajangersakkanik ukuninnga imaqarpoq:

§ 2

Inatsit ulloq 1. januar 2016-imi atuutilerpoq.¹⁾

Inatsit nr. 627, 8. juni 2016-imeersoq atuulersinnerani ikaarsaarnermilu aalajangersakkanik ukuninnga imaqarpoq:

§ 2

Imm. 1. Inatsit ulloq 1. juli 2016-imi atuutilissaaq.²⁾

Imm. 2. Arbejdsmarkedets Erhvervssikringi pillugu inatsimmi § 2 malillugu i Arbejdsmarkedets Erhvervssikringimi suliarisassanngorlugit nuunneqarsimasuni, aamma inatsisip atuulersinnera sioqqullugu Arbejdsskadestyrelsimi naammassineqarsimangitsut, suliassaqarfinni suliassanik Arbejdsmarkedets Erhvervssikringi naammassinnilluni suliarinnissaaq.

Imm. 3. Naammagittaalliutinik aalajangiinernut, kisiannili inatsisip atuulernissaa sioqqullugu Arbejdsskadestyrelsimi nalilersoqqinneqarsimangitsunut atatillugu Arbejdsmarkedets Erhvervssikringi nalileeqqiissaaq, tak. Kalaallit Nunaanni sulitilluni ajoqusernerup kingunerisassaannut isumannaarineq pillugu inatsimmi § 49, imm. 6 aamma 7.

Imm. 4. Sulianik ingerlasunik aamma sulianik suliareqqinneqartunik suliarinninneq nutaamik akuersinertaqanngitsumik Arbejdsmarkedets Erhvervssikringimi ingerlaannassaaq.

Imm. 5. Inatsisip atuulernissaa sioqqullugu Arbejdsskadestyrelsimut suliassanngortinneqarsimasuni imaluunniit suliarineqartuni eqqartuussivimmi suliassani Arbejdsmarkedets Erhvervssikringi eqqartuutitinniakkatut imaluunniit suliassiissutit inissisimassaaq.

Imm. 6. Arbejdsmarkedets Erhvervssygdomsikringip pigisai nalillit aamma inuussutissarsiornermi nappaatigilikkat il.il. pillugit suliani pisussaaffiit ulloq 1. juli 2016-imi Arbejdsmarkedets Erhvervssikringimi siulersuisunut nuunneqarput.

Imm. 7. Inatsisip atuulernerani suliani aalajangersimasuni Arbejdsskadestyrelsip aamma Arbejdsmarkedets Erhvervssygdomsikringip piunasaqaataanut Arbejdsmarkedets Erhvervssikringi inississaaq. Taamaaqataanik sulianut aalajangersimasunut tunngatillugu Arbejdsskadestyrelsimut aamma Arbejdsmarkedets Erhvervssygdomsikringimut piunasaqaatini inatsisip atuulernerani Arbejdsmarkedets Erhvervssikringi inississaaq.

§ 3

Imm. 1. Nalunaarutit, Kalaallit Nunaanni sulitilluni ajoqusernerup kingunerisassaannut isumannaarineq pillugu inatsisikkut atulersinneqarsimasut atuutiinnassapput, atorunnaarinneqarnissami imaluunniit allannngortinneqarnissami tungaannut.

Imm. 2. Arbejdsmarkedets Erhvervssikringimi aamma Ankestyrelsi 2016-imi sulianik aqutsinermut manna tikillugu maleruagassat malillugit Arbejdsskadestyrelsini pisortamit aalajangersarneqarsimasut akigititat atuutissapput.

Suliassaqartitsinermut ministeriaqarfik, ulloq 16. januar 2017

TROELS LUND POULSEN

/ Nanna Møller

-
- 1) Pineqarput inatsimmi § 14, imm. 1 aamma 2, § 14, imm. 5, § 17, oqaaseqatigiit aappaat, § 43, imm. 2, oqaaseqatigiit siulliit, § 43, imm. 3, § 49, imm. 8, aamma § 64, imm. 1.
 - 2) Pineqarput inatsimmi § 1, imm. 2, § 3, imm. 1, nr. 1-3, aamma imm. 2, § 7, imm. 1, nr. 1, oqaaseqatigiit pingajuat, aamma imm. 3, oqaaseqatigiit aappaat, § 14, imm. 6 aamma 7, § 15, imm. 1, oqaaseqatigiit siulliit, § 16, imm. 2, § 21, imm. 3, § 28, imm. 2, oqaaseqatigiit aappaat, aamma imm. 7, § 29, imm. 4, oqaaseqatigiit siulliit, § 30, imm. 2 aamma 3, § 31, imm. 4, oqaaseqatigiit pingajuat, § 32, imm. 3, oqaaseqatigiit aappaat, § 33, imm. 1, oqaaseqatigiit siulliit aamma imm. 2, oqaaseqatigiit siulliit aappaallu, § 35, imm. 4, oqaaseqatigiit siulliit, § 37, imm. 1, § 38, § 39, imm. 1 aamma 2, imm. 3, oqaaseqatigiit siulliit aappaallu, aamma imm. 4, § 41, imm. 1, imm. 2, oqaaseqatigiit siulliit pingajuallu, aamma imm. 3, oqaaseqatigiit siulliit, § 43, imm. 1, oqaaseqatigiit siulliit aappaallu, imm. 2, oqaaseqatigiit siulliit tallimaallu, imm. 3, imm. 4, oqaaseqatigiit siulliit aappaallu, aamma imm. 5, § 44, imm. 1, oqaaseqatigiit siulliit aappaallu, aamma imm. 2, oqaaseqatigiit aappaat, § 45, imm. 1 aamma 2, § 46, imm. 1 aamma 2, § 47, immk. 1 aamma 2, § 49, imm. 1, 4 aamma 5, imm. 6, oqaaseqatigiit siulliit aappaallu, aamma imm. 7 aamma 8, §§ 50-51, § 52, imm. 1, oqaaseqatigiit aappaat, imm. 2, imm. 6, oqaaseqatigiit aappaat-arfernat, § 53, imm. oqaaseqatigiit siulliit, aappaat, sisamaat tallimaallu, imm. 2, oqaaseqatigiit aappaat, imm. 4, oqaaseqatigiit siulliit, imm. 5, aamma imm. 8, oqaaseqatigiit aappaat, § 54 sioqqullugu qulequtaq, § 55, oqaaseqatigiit aappaat pingajuallu, § 56, imm. 1, imm. 2, oqaaseqatigiit siulliit aappaallu, imm. 3 aamma 4, § 59, imm. 1, oqaaseqatigiit siulliit aappaallu, aamma imm. 2, § 60 sioqqullugu qulequtaq, § 60, imm. 1-4, § 61, imm. 1, oqaaseqatigiit siulliit aappaallu, aamma imm. 3-5, § 62, imm. 1-5, § 63 sioqqullugu qulequtaq, §§ 63-64, § 65, oqaaseqatigiit siulliit aappaallu, § 66 sioqqullugu qulequtaq, § 66, § 67, imm. 1, § 68, imm. 1 aamma 4, § 69, § 71, oqaaseqatigiit siulliit, §§ 73-73 a, § 74, imm. 1 aamma 2, aamma § 75, imm. 1 aamma 2.